





石隱園藏稿卷七

淄川 畢自嚴景曾著

疏三

庫貯將竭疏



題爲庫貯將竭敵氛未息臣部憂危無計顛懇聖明速  
賜鑒裁事自聞敝至今已五十日矣索餉之檄急如星  
火屢厯明旨令臣措備接應毋致匱乏臣實司計敢不  
惟力是視顧臣所能者酌盈以佐虛那寬以就急若已  
虛而無可酌極急而無可那而欲使臣點鐵成金無米  
爲炊臣計畫無復之矣當羽書初至之時臣夜召筦庫  
司官發解衝邊及薊密昌易等處餉計可二十餘萬



蓋欲資戍卒之飽騰收掃蕩之奇功則垣墻旣固門庭自可無虞迨夫遵城不守飛騎薄城外解邊輸南北梗塞不知各鎮庚癸之呼何如而臣卽鞭長豈能及馬腹哉患在門庭城守爲重約京營登陴遊防之卒以十餘萬計援兵以三萬計新兵以二萬計日費不下萬金而將來者尙源源未已也昨太倉管庫主事馮世熙揭報空誑之形臣已據實入告蒙皇上許臣新餉舊餉通融支發並借別項湊給今合新舊二庫已共發銀九十餘萬兩所存庫銀僅十餘萬兩而臣部廊庫所收各衙門捐助銀項隨收隨發約有八千二百餘兩不與焉以五十日軍興費近百萬而驅勦尙未有期區區見存十餘

萬金不過足支十日糧耳與言及此心膽俱碎竊思臣部錢穀一銖一粒皆仰給于外解雖屢奉明旨着臣行催并令經過州縣設法防護然都門以外行旅久斷州邑快壯僅百十數村落居民強半逃亡而欲責之護解錢糧以達京師臣知其萬萬不能也夫庫藏旣如懸磬外解又屬西江幸旦夕解嚴則可不然此城內外十數萬擐甲操戈之士臣部連日供億若奉驕子且懼其有後言如一呼焉而無以應不惟臣身未知死所而國家之禍將有不可言者矣臣不得不早爲披陳仰請聖裁速爲議處者也臣草疏甫畢又據管庫主事馮世熙呈稱太倉額設軍馬錢糧按月而索時刻難稽外有各項



雜支頭緒紛沓亦必循例而應今庫藏空匱已極而索銀者時詘猶欲舉盈職不得已曾具揭遍投欲將俸銀一事少需時日候淮課到日補完尙未知肯見諒否惟是衛弁諸人素有布絹二季俸銀舊例布俸在本年十二月支絹俸在次年二月間支今各弁亦備城守遂統欲領出職已那給布俸共支過一萬七千四百餘兩而各衛弁尙索絹俸不休查該四萬一千餘兩誠恐供應不前而紛囂難杜也該臣聞此益用不寒而栗合無請乞明示凡一應官俸及諸不係軍馬錢糧一切暫需時日以佐軍興之急誠爲便計亦可以稍救然眉於萬分一耳奉 旨兵餉急需爾部嚴催外解權宜設法務期

接濟俸絹等項依議傳與各衙門知道

欽奉上傳疏

題爲欽奉上傳事本月二十三日奉上傳戶部軍興城守糧料等項一應本折錢糧支放總撒數目詳開具奏欽此臣隨行文各倉場司官各管庫司官各坐門司官暨各城專管援兵行糧司官徹底造冊以便彙奏庶幾軍興支用之數臣部供億之苦可備達於宸聰矣惟是頭緒多端未可咄嗟清楚以倉場言或給城守軍士或給赴援兵將或解運或面給或派東而西領或派甲而乙領至繁襍也以管庫言或廩糧銀或米折銀或鹽菜銀或熟食銀或運價銀或糴買銀亦至繁襍也以坐門



各官言或城軍米或門軍米或煤炭錢或姜椒錢或本折間支或先後補給亦至繁襍也以專管行糧各官言或就便兌發或收貯續發或有請輒給而營伍倏移或張受李糧而支應難拘亦至繁襍也伏祈聖恩俯寬數日容臣分頭督催星夜攢造上塵御覽抑臣於此竊有感焉師行糧從原屬正理兵食相劑何事不濟而無奈援兵怯敵每先借糧料缺乏爲辭臣部堂司相向隕涕耗盡心血以供轉輸需米豆則以米豆應需草束則以草束應需熟食烘炒則以熟食烘炒應東呼則東應西呼則西應倏東而西倏西而東則轉環互運以應但得運至城頭縋至城下使兵將無言便爲至幸如關寧一

師隔兩重城墻以應其急米豆堆積如山梨口溜放如水尙以缺乏屢屢聖懷及至潰散拋至城根者不可數計帶之馬上者盡撒沿途如滿桂一師聞其將出迎敵臣遣司官督放糧料未已復偕臣同官侍郎曹珍親詣城頭督放止糞飽騰不敢拘拘額數而該鎮猶數稱缺乏及至行後米豆堆積煤餅狼籍臣亟諭專管司官清查而事屬隔城防守爲難終多拋棄又德勝永定二門先後兩次共發銀一萬兩恐其出征日久聽其權宜支用今滿桂不知下落須俟同行將領歸營方得查其作何開銷總之援兵情事臣部艱危處處皆然而兩營其最也凡此一顆一束誰非皇上金錢臣部膏血倍蓰支



放尙難必其有餘晝夜肩擔半盡付之無用言念及此不禁刺心卽如草束一項輓運艱難已蒙聖鑒稍有車輛不繼稽遲時刻者臣每大聲疾呼自分必無死所而百計濟之間有人力駢至運發稍充者飼馬之餘半屬爨具矣臣且奈之何哉臣奉職無狀軍興罔效姑俟敵氛稍息方敢蒲伏闕下候皇上斧鉞之誅茲因清查錢糧數目不覺艱苦下情娓娓欲溢猶嬰兒痛楚不禁號呼於父母之前也

再議收買疏

題爲遵旨再議收買料豆事該臣部題奉旨這派買豆地方並價銀動支俱依議豆係目前急需如何至冬方

完還着另議具奏臣竊照軍興以來一切本色惟料豆措備最艱臣方身嘗其苦攢眉莫繼幸皇上諭臣通行山東河南買運以廣積貯臣豈不欲其朝受令而夕報完顧臣職在度支官稱民部國計民瘼難分二視側聞去歲夏秋之間畿南及中州二東多苦旱荒田野所收必無厚藏又况津門海運料豆亦派省直收買兵火之餘耗費頗多召買之檄一下豆價必至騰貴將厚償之則難在官將賤售之則苦在民且以數萬之豆而轉運自千里之外脚力所需亦復不貲當此三空四盡之時州縣設處猝未易辦兼以豆之爲物不堪久貯稍遲數歲易致紅腐故畱一半於十月以寬其力徵一半於三



月以過其期蓋揆之事勢不得不如是耳庶幾催科之  
中稍存撫字之意使畿輔與中州二東數百萬生靈謂  
皇上雖倥偬軍務猶不忘寬恤至意則人心益固內治  
而外自寧矣奉 旨依議行

司計罔裨疏

奏爲司計罔裨瘵官自慙謹據實投劾仰懇聖明罷遣  
以無悞軍國事臣以葑菲庸才謬膺度支之寄適當匱  
乏屢覩艱危臣事事從實行去件件從頭做起矢心竭  
力仰報聖明絕不敢畏難苟安卽衰殘多病與死爲鄰  
亦不敢乞骸自便無奈敵患突發黔技益窘捫心自省  
積戾多端有不得不白陳于君父之前者方未有警報

之先九邊缺餉在在脫巾臣裒益調劑陸續接濟雖積  
欠之相沿已久而勉強補苴惟力是視不敢諉也迨直  
薄都城之下援守兵馬一時鱗集雖事出不測急遽倉  
皇而多方支應亦惟力是視不敢緩也迄今敵氛未息  
需餉愈殷中外環呼遠近待哺旣需月糧又需行糧旣  
急本色又急折色外解當風鶴之餘尙裹足而不前邊  
鎮丁用師之際多大聲而呼庚其難其危更有萬倍疇  
昔者卽令長才處此亦當束手况鄙劣衰殘如臣魯一  
籌之莫展寧能勝任而無忝乎且臣自聞警以來宵旦  
經營凡九旬於茲矣手不停批目不停覽晝不得食夜  
不得寐今已心血俱枯昏聩健忘寒裂面而不知其楚



齒搖落而不知其盡肢體委頓動須扶掖狼狽光景萬目共擊臣卽欲振刷撐持而有所不能矣以極衰極殘之人擔極重極大之任復遭極艱極窮之時稍有不繼動干軍機雖夙夜在公不辭勞瘁而勦力殫竭鞭算安施五夜撫躬且悚且愧誰司國計而令匱詘至此竊恐溺職已甚補過無期與其終悞軍國不若先請譴責蓋臣一身之存亡生死不足惜而國計之有無盈縮大可憂也人知臣不如臣自知之真人劾臣不如臣自劾之悉方今九列多賢儘堪倚毗伏祈皇上俯鑒臣力綿弱臣病阨危臣罪深重臣言迫切亟賜處分或念臣拮据微勞與之罷斥速推才望大臣一員接管助勦以足財用卽不然置臣法曹從重議罪以爲司計無狀之戒苟有利於社稷臣雖死瞑目也奉 旨卿典司國計承平亦當竭力况茲邊氛未靖軍興旁午正須大破積習實圖幹濟何得投劾自便

再疏投劾疏

奏爲軍興黔技已窮才薄瘵官自慙謹再疏投劾懇祈立賜譴斥以自爲宗社大計事臣莊誦明綸仰見皇上念切兵氛憂先軍餉其所以責臣者實所以寬臣也臣卽犬馬無知敢不俯竭綿薄仰副宵旰惟是財用一事國家命脉蒼赤脂膏胥茲攸賴故周以冢宰制國用漢以丞相調軍食蓋其重也木爲天下第一大事今又爲



天下第一難事是必得天下第一流人而用之始能勝其任而無忝如臣謏劣非其人也自聞警以來迄今五閱月矣內搜而帑藏罄懸則虞空匱外催而輪蹄絡繹則虞騷擾臣雖刻刻不敢釋懷究竟事事不能應手向猶刻意籌畫今伎倆已窮徒覺心血之日枯向猶黽勉拮据今筋力已竭徒覺手足之無措上不能追九府五幣之法阜財而奏理次不能繼鑄山煮海之術富國而強兵蓋臣之所可殫竭者鞠躬盡瘁之心而臣之不能增益者官天府地之財邊兵之枵腹未已而援兵又復待哺月糧之捉襟未已而行糧又復耻壘烽火無容姑待不妨以額內之需供額外之求而正項將何抵補撻

伐方在殷繁急須以有備之儲應無方之用而逝波從何取盈頃臣奉旨條議非不智盡能索終覺零星補湊大類剝肉醫瘡不但媿經國之遠猷亦且慮焚林之滋議矣近見兵部職方司郎中周夢尹有招兵正以無兵加餉正以無餉一疏內稱戶部催餉十一人出風霾竟日等語臣捧讀慙媿無地自容是臣之頽齡綿力爲臣獨知所自信而臣之寡才薄識又爲旁觀所洞晰者也古人固有不加賦而財用足又有廻箸算鞭而錢流地上者臣何敢望萬分一也方今財用委實告訕軍興委實不敷臣旣一籌莫展四顧茫然豈容尸素而取國事爲嘗萬難虛糜而惟好爵是戀古稱國家閒暇及是時



明其政刑而必先之以賢在位能在職今雖不可謂閒暇而烽火漸遠政造物者假我以桑土綢繆之會也及今擇人而急圖已爲後時若再妨賢而廢事嗣將何補異日匱乏滋甚戎務決裂卽治臣以失機之罪亦何救於宗社安危之數哉且臣閱歷中外荏苒幾四十年率多邊鄙搶攘之地而素心拙性每事皆從實做去銷耗旣久困憊轉深茲又加以數月之徬徨桑榆暮景寧復如昨痰嗽每不停聲步履更多艱難自入春月眩暈時作心神潰亂捉筆數字輒有謬誤計此鐘鳴漏盡之年寧有幾許光陰卽承平無事亦止足當裁况戎馬生郊敢因循誤國惟是敵未出境誼難乞骸此臣終不敢以

病請而惟以罪請者也方今聖明在上耆碩盈廷政不乏心計之臣可資倚毗懇祈皇上重念時艱急籌大計將臣立賜罷斥仍重加譴責以爲瘼曠溺職之戒速選才賢用充任使但使國計有裨臣卽伏草野而加斧鑕有餘甘矣辰下部務方殷臣未敢晏居私寓見今扶掖署中藥裹自將區區血誠期得請而後已蓋原從國家起見而非敢爲一身一家之計諒日月照臨之下當必有以鑒此也奉 旨軍興浩費司計需賢卿殫力甚勞誠心幹辦一應兵食方賴持籌何得輒有陳請

比例陳情疏

奏爲骨肉沉寃未雪慶恩覃布無方謹哀鳴下悃比例



陳情仰丐皇仁事臣胞弟自肅濫竽遼撫兵變隕身揆厥釁端實因缺餉維時邊吏計臣互相閔許屢煩廷臣會議皇上獨持宸斷削臣弟生前官階以杜邊臣之口實鐫侍郎王家楨名籍以明稽餉之禍胎臣愚自傷教弟無狀分當引罪復何敢置喙今時日漸久公論漸明敢冒死一言竊念臣弟爲國捐軀分也而身死無名則夜臺不無飲恨爲法受過義也而罪疑從重則肺石未免蒙冤試思羣烏合荷戈之士積饑累月雖慈母不能有其子在撫臣又安能有其軍嗟乎擁新餉四十餘萬視疾呼若罔聞知署部計臣旣坐此落職矣而說者猶謂變有別因不過卸擔之浮詞與夫旁觀之左袒耳豈

事懸兩是而法可互移乎哉試閱餉臣錢士貴關臣王會圖及餉司王楫等疏詳陳缺餉情狀是皆身居局內非語涉聞風者一段公案昭然覩矣夫論必久而後定功無微而不彰先是寧錦之役臣弟備兵寧前威名素著後以款嘗我臣弟憤激力阻旣受命撫遼選將練兵不遺餘力條議九款首以絕款爲言嗣是出沒錦杏之間臣弟先期收斂野無所掠未至寧遠城下而退復督主客兵亟築錦杏二城匝月工竣藩籬以固而怨亦用是興至於安插降丁尤極苦心故沒未兩日而有大梁王寨之捷皆臣弟徙薪之成算也當時督師題敘巡關勘功俱謂臣弟積勞難泯橫被宜宣兵部題覆亦在敘



錄之列近接邸報王家楨以甘肅捷功已敘復冠帶矣夫家楨前爲甘撫後爲計部者也司計召亂則褫之撫甘著庸則復之仰見聖明恩威原自轉圜臣弟撫遼者也死于餉而有可原之情勞於遼而有難泯之功同爲王臣寧慳一視且臣亦未敢徑情乞恩已也臣幸逢冊立大典伏讀恩詔循例得晉本品勲階一等錫之誥命臣自惟度支溺職屢次投劾方凜斧鉞之誅敢冒司勲之敘惟是臣弟茹荼賫志死未瞑目遺孤三人俱在鬚鬣每家信來問臣葬期且云父職未復不敢歸骸九原臣用日夜痛心有淚難揮竊效古人春鴿之誼妄希聖明惟蓋之仁願以臣應晉之階代復臣弟之官如謂前階未足爲贖查臣前歲二品考滿蒙恩加授太子少保萬龔准辭宮銜止存部銜以明國家之法以贖臣弟之罪而復其官俾令枯骨早得入土臣與臣弟幽明可質生死無媿是則皇上浩蕩之鴻慈也

### 三懇天恩疏

奏爲聖主鴻慈愈隆微臣病軀難効軍國至重尸素堪羞三懇天恩速賜褫斥以無悞封疆鉅務事臣竊幸遭時遇主卽葵藿微誠亦蒙睿照不遺惟是三覆明綸如謂殫力甚勞臣固不敢以勞爲言又謂司計需賢臣又安敢以賢自居不賢而徒蔽賢者之路徒勞而未收勞臣之益故前此不敢以病請而惟以罪請耳乃臣則實



病而病且甚矣臣之病非陰陽偶值之病乃衰朽不支之病也臣之病又非旦暮可起之病乃桑榆垂盡之病也皇上亦知臣支離之近况乎痰嗽連綿不已飲食減少異常步履徒次且而艱於前進跪拜將僵仆而不能振起在私衷每自悚惶卽旁觀無不詫異倘令四裔聞知不將笑中國之無人乎至於心血枯槁眩暈健忘以致叢脞差訛之事層見叠出卽欲極力振勵仰對我皇上天高地厚之恩乃暮氣徒張真精已竭非但力不從心究且心隨力耗而頽然自廢矣皇上寬臣畱臣無非以兵食浩費尙異臣之持籌耳臣豈不知疆場未寧天恩未報非臣子乞骸自便之時而政惟此兵餉方殷幹

辦無能一日苟祿妨才賢一日之展布一日悞事遺君父一日之宵旰誠百念迴環而一息無容姑待者也故臣前疏中卽以得請後已明告之皇上矣比者勉支三旬而殘軀愈加困憊入夏以來勞火延上目苦昏瞶文移莫辨耳苦重聽人語莫聞神思憤亂筋脉拘急恰似氣血殆盡而且夕隕越者此等光景延喘未遑何能持籌部務重大寧堪廢閣若臣明知悞國而尙敢貪恩戀棧依徊不決無論清議難容功令難寬卽區區良心豈能自昧乎哉謹額手呼天三申前請仰乞皇上俯念兵餉之需責未易勝衰殘之久病非假託將臣速賜褫斥另選精敏心計之臣刻期受事庶會計當而財用足軍



國大計實嘉賴之臣卽不能致身自効猶不失以人事  
君之微忱耳奉 旨征調紛紜度支繁劇賴卿殫力幹  
濟前旨已明何得又有此奏所請不允

酌議徵解疏

題爲催解幸有次第額徵宜遵畫一懇乞特勅有司不  
得借口槩徵重困窮民以溥皇仁以急正供事項緣捷  
伐伊始供億不貲致厯聖諭臣部開列各省直應解之  
數奉有俞旨已經立限差官守催訖但臣部所條列應  
催者元二兩年之額解及三年現徵之五分也夫兩年  
之額解承平亦亟考成倥偬詎容緩視此固歲事所應  
辦者現年之五分舊餉較往日似爲創始新餉較往日

止多徵二分且時已麥秋卽半完常賦亦非厲民况患  
切剝膚其誰無同仇之誼忍靳此維正之供也然實於  
崇禎三年內求完京邊之一半非強索於現年之外也  
第就現徵計完欠未暇爲壓徵計蚤晚也臣查新餉止  
有江西一省壓徵其餘皆係現徵舊餉壓徵地方較之  
現徵地方稍多然臣前疏有那借措解一語正謂壓徵  
之難法當於現年中通融之也蓋現年中不無存留可  
緩之錢糧稍一通融便可爲預解之地卽如河南山東  
壓徵州縣崇禎三年應辦二年錢糧然按籍而稽京邊  
不過十分中之三耳卽以京邊五分而論不過十分中  
之一分有半耳其它王糧驛遞河工倉糧廩俸工食等



項尙有十分之七也若於七分之中那借一分有半以應壓徵之京邊不過一轉移間而國與民兩受其利實目前通變之微權也卽曰錢糧各有款項那借事或難行則通計一歲大糧止徵一分有半而五分之京邊完矣若因預徵京邊之五分而遂全徵大糧之五分徒以征繕剝百姓之脂膏而以羨耗潤巧吏之囊橐是臣部所鄭重而慎於一請者郡邑且藉口而恣行無忌也究令士紳駭顧蒼赤怨讟必曰朝廷何故一年而追年半之錢糧究將二年而完三年之賦稅民何以堪命乎臣無所逃罪矣如預徵十分之三專爲每地一畝加派九厘之遠餉而設也乃州縣不加詳審并正項錢糧槩行

預徵三分夫九邊匱乏臣豈不願蚤徵蚤解以救燃眉然民力有限竭澤難堪用一緩二乃爲可繼况乎開徵自蚤解部自遲獻骨吸髓僅以供本地工食雜支之用可惜也催徵不按定期則小民不知年分而在官寅搜卯糧之弊易生可慮也在相沿現徵者止蚤徵數月在相沿壓徵者且蚤徵一年尙壓徵預徵并集一時誅求更慘可悲也所當并行申飭者也微臣仰體皇上軫念民瘼之心每思勉圖節用愛人之法要當於催科中存撫字原非廢撫字以催科當此懸罄反裘之時倍切杞憂緯恤之念伏乞勅下各該撫按及奉差官員申諭州縣遵照原疏開去款額元二兩年刻期完解三年現徵



地方春夏先完京邊五分秋冬全完不得諱現徵爲歷  
徵其歷徵地方今歲止追五分之數若能通融那解者  
上也不則卽行預徵五分亦適如其京邊之數而止不  
得借口一槩混徵明年大糧卽徑解邊糧及兵工二部  
錢糧亦不在預徵之內其預徵京邊五分仍俱寬至秋  
成於八月後報完果有新餉歷徵者亦如之若至明年  
秋月亦僅如今年五分之例而止不惟非全徵大糧之  
十分亦併非全徵京邊之十分於以定驚疑之衆志而  
蘇民困於萬一如故違者許該撫按及奉差官員不時  
叅奏庶官方慎而民力存芴竇塞而正額裕矣

請罪自陳疏

奏爲微臣奉職無狀敵愾負罪良深懇乞天恩俯賜譴  
責以申國憲事臣聞之主憂臣辱四郊多壘卿大天之  
耻也非獨分無所逃抑法實不容貸耳頃者天威撻伐  
迄以廓清實惟恃我皇上如天之福真所謂制勝於廟  
堂之上者也惟是原本始末在戶言戶捫心內訟微臣  
之罪真有無地可少逭者臣實司計不能裕國使士飽  
馬騰預遏敵於塞上洵臣之罪及乎蹂躪近地以勤我  
各鎮師旅又不能峙糗備糗椎牛犒饗作投石超距之  
氣奏片甲不返之捷洵臣之罪左藏瓶罄臣曾不能催  
饋外運源源日積俾冬春之轉輸幾乎中斷致厯聖慮  
焦勞洵臣之罪漕艘鱗集臣又不能預收凍糧先爲清



野之防卽勉強拮据借手羣工幸無隕越而猶有被火之船見浥之粒洵臣之罪海寓困窮臣又不能與天下以休息而使催差四出寇蓋相望卽輸輓少集而民力竭矣洵臣之罪至若新漕尙若底滯未見更絃鹽屯尙同築舍未收實効于垣之役正慮經費不前鋪墩之師徒令勞人借口凡此種種皆臣之罪臣真擢髮不能以悉數而膏斧固有餘辜者也且也各部諸臣有事半而更者有受事方新者微臣獨以黔驢旣窮之技終始戎作時愈久而罪愈叢矣各部諸臣有以罪而蒙斥者有以罪而蒙譴者微臣獨以樗朽多戾之身屢荷優容恩愈隆而罪愈不可逃矣臣實有不可逃之罪而國又有不容貸之法臣一日竊祿位若寇至之承其羞也一日偷視息若鬼責之伺其旁也其何敢以負乘微臣而久稽憲典耶伏乞我皇上置臣於法以爲司計不效者之戒庶玩愒之人心悚息於震疊而中興之景運炳煥於新猷矣奉 旨軍糈旁午卿多方轉運具見勤勞目今邊備孔殷分防練募正轉輸四應之時宜益加籌畫俾飽騰奏績毋乏軍興不必引請

#### 四懇罷斥疏

奏爲臣病貼危已甚臣職曠廢堪憂四懇天恩亟賜罷斥以無悞軍國大計事竊念臣至駑駘景逼桑榆才甚劣年甚衰而病又甚深自惟通籍以來迄今三十九年



承乏中外歷任邊疆牛馬奔馳久未息肩日積月累百  
衰盡見飲食日減脾胃不調時苦健忘兼多眩暈每至  
夏秋輒復增劇客歲七疏休致未荷皇上俯允嗣是都  
城戒嚴臣實承乏計務忍死支撐委無一事一刻敢自  
暇逸入春以來餉務繁重病體支離臣復三疏投劾並  
請罷斥復荷明旨勉畱責成諭以殫力幹濟臣雖庸愚  
困憊安敢不力疾供職勉圖策勵敵騎一日未退靡敢  
再言乞骸以自附於臣辱臣死之誼今幸天威遐播亦  
旣戩兵宵遁矣臣是以有微臣奉職無狀一疏我皇上  
乃輒許以多方獎以勤勞又復責以四應望以騰飽知  
我皇上寸長必錄而期望甚殷也惟是古稱陳力就列

不能者止從來久矣欲治兵者必先有飽滿充實之餉  
而後可足兵欲籌餉者必先得精明強固之人而後可  
足餉而臣愚何如哉臣以衰病之殘軀值茲軍旅之雲  
集黔技已窮杞憂未歇愁苦相煎時日淹久怔忡交作  
痰涎壅盛頃刻輒有遺忘几席旋生掛漏則智慮所不  
及政務所曠廢者多矣且也臣部日進章疏日行文案  
雖各有司存而非經臣之心到目到手到何敢拜發不  
謂精血久耗雙目赤腫畏日羞明流淚如注則文移之  
簡閱爲難右臂酸麻晝夜痛楚每捉三寸之管如發千  
斤之弩則案牘之批發爲難足膝軟弱步趨不前陞降  
階級須人扶掖則朝參之奔馳爲難其他龍鍾潦倒奄



奄待盡之狀不可殫述舉朝臣工更無衰病如臣比者  
司農何官今茲何時而以龍鍾潦倒之人竊據其間誠  
拊心知懼亦顧影自慙矣矧新舊額餉有限而軍興浩  
費弘多京卿漸次還朝而外解愈覺稀濶援兵俱動歸  
思而行月任意要挾當此之時卽令敏手亦費持籌而  
况臣之謏庸衰病者哉臣一身不足惜而所誤國事者  
多矣月今在邊疆爲劫數之終在國運爲治平之始政  
及時整頓之機會而理財固本又第一要務先此猶得  
托於鞠躬盡瘁之義繼是將不免有曠官竊祿之羞在  
聖明卽曲爲優容在清議必倍爲誚讓是臣之所自知  
甚明望恩甚切者也是用哀籲聖明四申前請仰望皇

上自爲軍國大事計蚤賜罷斥別選才賢於以充軍實  
而資撻伐臣仰戴鴻慈如天罔極矣奉 旨卿清慎敏  
練已屢旨眷畱且邊防孔棘轉餉維艱殫力運籌正資  
石畫何得引疾頻請着卽安心視事不允辭

### 辭敘賚疏

奏爲天恩隆重寵渥涔涔頒謹顛闡控辭以安愚分事臣  
聞忠勤者服官之大義義不可以私逃爵賞者礪世之  
大典典不可以濫得臣以謏劣待罪計曹拮据捋瘡二  
載于茲惟是職在供億夙夜冰兢期無失墜以逭罪戾  
屬以皇威遐布光復城邑臣最不才得從閣部諸臣之  
後恭承恩敘奉旨畿輔救寧在內運籌宣力諸臣允宜



敘賚畢自嚴加太子太保賞銀二十兩紵絲二表裏欽  
此臣竊不勝惶悚不勝隕越夫人臣列職一品則爲崇  
階蒙恩蕃錫則爲異數不圖一介寒賤遭逢聖明濫竽  
非分一至此也憶昔變起倉卒屈指內外新舊主客官  
軍幾以二十萬計倉庫單虛餽餉殷繁朝索糗糧暮索  
齋糲彼徵酪漿此徵藁豆財賄旣苦於不給頃刻又慮  
其難辦嗣是敵騎漸遠大兵愈集旣輦負以供薊永之  
師復舫海以給關寧之旅接濟維艱呼吸生變臣於此  
時肝膽幾碎迄今念及魂魄猶悸乃者得徼如天之福  
以有今日皆賴宗社鴻慶聖武布昭帷幄多籌三軍用  
命若臣捫心固自不敢居功卽臣揣分實亦無功可言

且非獨無功已也捉襟幾於露肘旣有不能先事綢繆  
之愆剗肉持以醫瘡復有不能後事助勦之罪此卽倖  
逃斧鑕已屬鴻慈况復忝竊寵榮寧堪冒昧以國家破  
斧缺斨之役藉爲邀寵增秩之梯臣實痛之以軍興倉  
皇支吾之技得同戰勝攻取之賞臣殊羞之以庾藏三  
空四盡之時復有倖功蔽罪之舉臣尤懼之况仝臣協  
力者爲左右諸臣代臣奔命者爲司屬諸臣一切踉蹌  
竭蹶之狀皆臣目擊痛定思痛久思代陳猶嫌自明今  
諸臣多未收錄而微臣獨攘天功臣入質衾影何以自  
存出對僚屬何以視息此臣所以踟高躋厚萬萬不敢  
祇承者也伏祈俯鑒微衷收回新命俾臣得以原官自



劾又或憐臣老敝放臣歸田天之仁也地之慈也臣不勝犬馬私願奉 旨軍興旁午轉給維艱卿一力拮据成勞可念持茲加賚用示敘酌宜卽祇受不必遜辭

召對認罪疏

奏爲錢糧過厯睿慮召對倍切悚惶謹束身認罪以候天譴以祈慈鑒事竊念臣年力衰邁智慮短淺當此民窮財盡之時動見捉衿露肘之狀黔技易竭蚊負難勝既不能地流泉湧資士馬之飽騰又不能握算持籌寬聖明之顧慮臣職實溺臣罪滋深少發則以現支爲壓支而九邊之疾呼如故多發則盡入數爲出數而京師之催解無存欲清錢糧先查兵馬而督撫之確報杳然欲令月奏或爲季奏而各鎮之奉行不速蓋前車旣覆已坐知人之不明而後效未臻大彰率屬之無狀矣至新舊二餉司薛邦瑞喻思慥案牘旁午磨算稽遲今俱奉旨回話然該司官之罪實皆臣之罪也臣之罪臣愚猶自知之而况聖明照臨在上乎今奉召對申飭側聆天語之諄切仰服聖慮之精詳無微不至無遠弗届臣自揣疎愚迷謬真不覺補過之靡及措躬之無地矣謹束身認罪伏望皇上軫念四十年犬馬衰朽駑鈍稍寬斧鉞之誅姑從褫斥之罰實天覆地載之鴻慈也奉旨軍需正殷卿老成勤練還遵諭率屬稽出入酌虛盈以佐國計不必代爲引咎



開報軍興錢糧疏

題爲奉旨開報軍興錢糧事查得軍興錢糧原因變出倉卒費屬無經凡登埤而守列營而居者靡不仰給臣部以爲供億以故在本色則有給米豆芻束者有給熟食烘炒者在折色則有給官廩行糧月糧等銀者有給米豆草束折銀者有給薑椒煤炭銀者儲糗不敷繼以招買飛輓無術假以運價其間頭緒不啻絲紛然臣當應接不遑手口交瘁之日已蚤慮有重複詭冒之弊於是轉給者則屬之各門司官自領者則隸之各營委官稽兵數則據樞部之開報覈給發則取各官之實收其間通融本折衡量多寡酌豆價之貴賤而一秉時估參

運價之盈詘而一規里道皆臣殫心悉慮握算持籌惟懼萬一重冒有負聖明委任至意茲旣承還悉心磨對之旨敢不倍爲謹凜兼以日積月累自客歲十一月起至今歲十月終止已匝歲矣臣又行令各監督官細造清冊前來臣乃復加查覈照前欵項分查互對俾紛紜頭緒爲之一清且前此止報折色今則併及本色前此止算至崇禎二年十二月終止今則算至崇禎三年十月終止前此止及城守今則併及薊門臣於此而追想臣部之苦真有筆舌不能罄者矣夫當都城戒嚴固已鞠躬盡瘁心血盡嘔迨於旣退之後妄意宇宙清明邊鄙寧謐勤王之旅可撤額外之餉可減而臣部亦有息



肩之期也不謂蹂躪之餘藩籬盡毀於是興修繕之役  
增新募之兵而四方之入衛者且日增月盛索行糧索  
安家索月餉殆無虛日臣與司屬朝夕措處左支右吾  
幸無隕越然已智盡能索瓶罄壘耻矣今在新餉庫則  
放過銀一百九十九萬六千二百九十四兩銅錢五百  
四十五萬八千三百在太倉舊庫則放過銀六十一萬  
六千九百一十二兩銅錢一百三十二萬五千九百在  
本部廊庫則放過銀一萬四千九百八十五兩銅錢一  
千六百三十五萬九百在京各倉如舊太南新濟陽海  
運新太北新大軍西新祿米等倉共運放過城守援兵  
口糧行糧米一十七萬三千九百二十二石五斗馬匹  
料豆二萬二千四百六十四石七斗又京糧廳雲南司  
新餉司邊餉司崇文門共買運過城守援兵馬匹料豆  
高糧三萬一千六百二十八石在明智臺基北新安仁  
西城五場運放過城守援兵馬草共一百四十七萬五  
千三百五十一束蓋軍興一日未已則有一日之供給  
而錢糧一欸未銷卽有一欸之清算未能點金而量沙  
祇有量入以爲出誠不得不徹底通查一併奏開以祈  
聖裁者也

歲籥更新疏

奏爲歲籥更新衰庸宜退仰控聖慈俯允乞骸別簡賢  
能以襄國計事臣本溝壑斷材甘心廢棄遭逢聖明拔



居錢穀之司臣愚不自量力老馬爲駒以手足之隕於巖疆而臣不敢卸以邊腹之視爲怨叢而臣不敢避以二豎之呻吟朝夕而臣不敢休黽勉鞭策用圖報恩遇於萬一然聖眷日深而臣之罪戾亦日積矣當此春回黍谷計典聿彰薄海臣工莫不陟明黜幽共仰維新之化而朝班之上廼有枯朽如臣謏劣如臣者尙不亟自引退無乃甘爲頑鈍蔽賢路而悞國計乎向者奉職無狀屢懇聖恩釋放歸田荷蒙皇上不加斧鉞之誅許以桑榆自效臣以軍興倥偬主憂臣辱恐涉規避之嫌不敢堅意求退今論時則傳烽舉燧之漸稀論才非更絃易鼓而不可若臣之技能久已見於天下矣閭閻日困

非盡有司之撫字乖也臣實無能休養樽節爲四方培元氣也庚癸難戢非盡閩外之制御疎也臣實無能灑惠流膏俾三軍快果腹也從前條議非不連章累牘然皆集衆思以待宸斷所賴以支吾三載者非臣之果有纖長至於奉行又非不舌敝頹枯然皆賴明綸以警人心所懼於覆餗一旦者實臣之無容諱短矣况今邊境未平益以流寇一處蔓延則一處之兵餉祇有費而無補年例不足加以兵荒一日調援則一日之軍儲豈神運而鬼輸入春以來眩暈時作僵仆堪虞雖心碎髯枯而黔技久窮曾何裨於緩急之數况臣本強之性素不諧俗昏憊之衷近多周章百凡紕漏絕少劈畫撫躬循



省真有不敢一刻安於尸素者矣我皇上赫然中興安攘伊始非常之業必待非常之臣今在部同官及各衙門卿貳率多英妙敏練堪以重任皇上左顧而右盼且不勝收又何藉於臣之久試罔效者也倖免鼎鑊得盡天年於草野將世世銜戴高厚有餘榮矣伏乞皇上垂憐犬馬准其休致特簡心計賢臣刻期代臣受事軍國幸甚微臣幸甚奉 旨軍儲方急計務殷煩卿籌畫詳練精力正優何得遽有引請着卽出安心視事用副委任

微臣衰病疏

奏爲微臣衰病日深兵餉拮据不前懇乞天恩俯賜允

放以無悞軍國大計事夫軍儲關係在封疆而計務關係在邦本此非精力素優而籌畫詳練者未易勝任而臣非其人也臣以蒲柳之資馳驅中外已四十年備歷艱險而臣之精力銷亡久矣內軫民隱外供軍儲曲計而不能曲全兩籌而未免兩誤而臣之籌畫疎畧甚矣不意誤蒙聖恩獎飾踰涯而臣拊心自揣未有當也近且寰海援兵之衆經年不解薊永新集之師招募未已軍驕無饜急折色又急本色索行糧又索月糧每虞新餉之難繼九塞待哺舍民運專關京運完當年尙逋先年殊苦舊餉之難支雖按月造發已報呼諫無等欲計畝加賦又恐猷浚無藝方寸昏憤曾一籌之莫展手足



無措將跬步以難前此臣奉職無狀自知甚明而無所  
逃於聖鑒者也目今崦嵫日逼愁病相煎痰涎壅盛恐  
一蹶而不可復起牀褥呻吟寧高臥而克堪主計蓋少  
不如人而年愈衰則重任愈覺其忝竊病緣憂餉而病  
愈深則餉務愈恐其叢脞夫一身之性命猶輕而朝廷  
之封疆最重臣誠負芒坐針不能一刻卽安者也用是  
頂禮鴻慈再干乾斷伏祈皇上憐念三年來竭蹶之苦  
稍存四十載帷蓋之恩准乞骸骨放歸田里何異起死  
人而肉白骨也芟耘庸耄簡畀英俊是在皇上自爲軍  
國計耳奉 旨卿軫邊籌國素著精勤前諭已明何乃  
復有陳請軍儲時刻難稽着遵旨速出料理毋得再延

### 釐剔十款疏

題爲吏治更始民窮宜甦謹陳釐剔十款申飭寓內有  
司共圖保民實政以維萬世治安事臣聞聖王御世惟  
以保乂寓內爲先儒者服官要以節用愛人爲本國家  
以親民之責寄於求牧之有司三年考績以保障爲盡  
職繭絲爲瘵官故周時六計皆冠以廉漢代循良必稽  
戶口蓋操守潔者無不愛其黎民而生聚繁者斷難幾  
之墨吏良有以也邇者計典方行旌異懲貪涇渭分明  
恩法罔貸大小臣工諒各洗心震疊之下矣此時薄海  
蒼黔莫不延頸跽踵謂我皇上整頓官方驅除民害如  
此其嚴且盡也且晚膏澤下究百倍尋常當何如者惟



是貪墨雖去弊政尙存誠恐奸胥或習爲盤踞庸才亦  
憚於改絃不於此際申明禁約痛釐諸弊及其敗露曾  
何救於百姓凋殘之數矣臣民部也例得從銓序之後  
條上事宜爲民請命伏思今日邊徼未靖寇賊繁興兵  
議撤而未能餉欲減而不可一銖一粟孰非辦自民間  
所恃有司作民父母休養財力鼓其樂輸之念堅其好  
義之心豈非國計民生兩有攸賴者哉何堪饑鷹乳虎  
之輩借公行私橫加股削俾疾首蹙額之民成魚爛瓦  
解之勢抑可畏也與其懲創於已往何如戒毖於將來  
謹竭一得贅列十款具奏上聞一禁加徵耗羨一禁添  
搭貽累一禁濫收詞訟一禁濫科罪贖一禁罪外苛罰  
一禁官價買物一禁淹禁犯人一禁差役騷擾一禁趨  
承上司一禁濫用夫馬各款語多伏乞聖明採納著爲  
不能備載功令頒布有司咸相遵守庶吏治漸覺其改觀而聖澤  
覃敷於無外矣奉 旨近來吏治貪殘民生凋瘵朕心  
痛憤這十款關切時弊着實飭行

### 兵餉日增疏

題爲兵餉日增月益物力不支謹以出入大數據實披  
陳懇乞聖明從長酌議以圖久遠以定畫一事自軍興  
以來竭宇內之物力合加派雜項數百餘萬計輸之遼  
左而坐糜養癰曾無救於已巳之變今額內之兵餉分  
毫難減而額外之兵餉層累增加臣部之在今日主客



有交困之勢行月無兼資之策每每屈指計算仰屋咨嗟真未卜所稅駕也請得備陳於皇上之前舊額新餉官兵額外新增兵馬各處入衛援兵以上三項以歲計之共該銀六百五十四萬五千七百有奇又招買遼米遼豆草束併關鮮海運價值共該銀一百六十三萬四千五百有奇而閏月之餉銀鹽菜與薊永漕糧之運價約該五六十萬不與焉合之則八百七十餘萬矣此今日兵餉出數之大約也查加派襍項歲額總計不過七百三十餘萬耳而工部分餉之二十萬亦在其內即使如數全完尙缺百六十萬而况未必全完也此外尙有省直捐助向來賴以接濟而今後不可異矣南部事例

屢疏題畱尙成畫餅此今日錢糧入數之大約也臣總計出入滿盤打算計兵給餉止有此數多用一分卽缺一分在額內者旣減之而無可減則在額外者欲增之而無可增不知此嗷嗷待哺者將有天雨地湧之金錢否也客旣奪主之食主必受客之困坐糜厚糈未必見德而壓欠守候必且含怨所謂主客有交困之勢者此也入援之兵月糧取之本省行糧取之臣部屢奉明旨而今且何如其支行糧也認爲應得之物按期取索且圖預支其借月糧也挾以必與之勢一借不已視爲定例當該省解餉未至惟恨不能那此與彼及旣借後竟以膜外置之聽臣部之號呼而衰如充耳矣臣部卽



石隱園藏書  
三  
有點鐵之術何能分身四應所謂行月無交資之策者此也况簡查舊例加派雜項歲入逋負每至十分之二加增三釐額尙虛懸而各省以災疲求免者已次第見告矣卽歲前之預徵三分三月以來支用殆盡而外解且中斷矣當此兵驕將悍食苦衆而用不舒已犯生財之忌值茲勢窮力竭兵當恤而民堪念徒深仰屋之嗟於是節之一字至於今日而臣萬萬不能諱矣昔日敵據遵永其鹽菜增加用以鼓其敵愾之氣今處處修備在在增募而援兵之供億如故也聞諸道路之口似謂衝邊必不可撤而腹裏似不妨量撤兵之有用者必不可撤而兵之無用者政不妨量撤今通津昌涿之間閩

楚東粵諸兵久冒清人河上之誚一切餽餉該省旣不能源源而至臣部又不能舍已耘人倘亦可旱爲酌處否也如團練營雖曰防薊原係都門新募主兵曩者出防薊州不加給鹽菜則不能成行而今遂爲定例矣行月兼支長此安窮儻亦可以量爲酌減否也川兵旣屬客兵又同薊兵食部餉而行月亦苦兼支臣念其萬里遠戍比照關兵厚糈每月議餉一兩八錢頃接薊撫咨文又再與鹽菜以厭其欲推而忠義營之兵亦復皆然如孫顯祖防宣官兵係本將在籍招募其在城下曾與團練營一體支餉今援宣矣旣在臣部支月糧又在宣鎮支行糧此又舊例所無而今創起者也推而應援山



西饒勲林耀之兵亦復皆然又查從來大將非統領數萬之師未聞有開鎮者自有入衛之役而建牙纍纍矣官役公費等項多者以千計少亦數百計又有援兵不滿千人而聽用各官多至四五十員者果人人皆韓白之選乎不過以市僧之流冒沐猴之寇耳則裁冗官冗役以明節嗇而杜冒濫似亦目前之急務也至於招買海運煩費不貲而關寧援兵支行米又支月米獨不可一本而一折乎馬匹料草有支本色者有支折色者卽折色亦有一兩二錢與九錢之異者當茲青草漸茂獨不可改本爲折改多爲少乎雖謀國者不恤小費以妨大計而持籌者當量入額以爲出孔今行月無一不取足於臣部主客無一不責望於臣部所入有限所出無窮及今而不顧呼於君父之前待軍餉不繼庚癸頻呼而後言之嗟何及矣尤可慮者竭澤焚林識者寒心剝肉補瘡終當立盡釋此經制初報之時不詳爲更定而日鑿生民之元氣竭萬姓之膏血以供四方之驕悍無論勢必不繼卽令繼矣恐亦非久安長治之道也願我皇上之深長思也伏乞勅下樞部督撫從長酌議但得樽節一分則臣部受一分之賜而國計民生均賴之矣

恒賜示做疏

奏爲民生日困恒賜示做農政不修臣罪難辭懇恩謹斥以回天心事邇者兵餉倍增太倉告匱臣憂心如焚



所日夜冀望者惟年穀豐登輸輓無缺可少救然眉之急耳而無如亢旱千里三春不雨何也我皇上齋居減膳不遜桑林之禱矜宥纍臣不殊解網之仁謂可甘霖立應以符至聖之精誠廼皇穹屯膏猶若有所吝者臣捫心自揣拊躬省過奉職無狀之罪又安敢緘默而不以自暴也夫臣部職掌民事者也自邊難作而稅畝起供億者日新月盛搜括者智盡能索宇內之民力已云竭矣寬徭薄賦旣難徼惠於夙昔緩征蠲免又難望幸於目前新加舊加取盈一旦誰憐剝喙之悲見徵預徵交責終歲罔恤焚林之慘明知累年之積逋誅求頗艱而減一分便少一分之用度痛心近畿之招買疲累已

極而免一粒遂缺一粒之本色考成之令旣嚴繭絲之政愈密寓催科於撫字旣難盡信於有司防侵漁於漏卮安能責望於邊將肉雖剝矣終難補瘡瓶之罄矣唯壘是耻夫迫於追呼者賣男鬻女豈盡終事之民卽困於久戍者呼天籲地果皆同仇之旅在在抑鬱處處愁苦臣等上之不能宣鬯皇仁下之不能休養黎庶誰職民事爲此厲階所以昕夕徬徨仰天欲絕而知亢旱示戒已昭布臣之罪過於天下矣倘昊天不弔膏雨愆期三秋失望國課日虧秦晉之顯禍難療九邊之隱憂漸起言念及此臣溺職之罪可勝誅乎臣不敢逐隊襲陳惟是循分躊躇萬難自解屏息公署席藁待罪伏祈皇



上將臣立賜褫斥以爲計臣不能省賦綏民之戒別選賢能從長消弭庶應禱之甘澍立沛而封疆之餽餉無悞矣奉 旨軍興煩費民力殫窮卿籌畫心勞朕所素鑒不必引咎

因旱陳言疏

題爲聖主爲民求瘼微臣遇災思救敬陳職掌摠末議以答乾惕事臣聞之爲稼於湯之世者雖一溉之功無益然必一溉者後枯此喻養生也而可以喻養民蓋久旱時之桔槔稍蘇須臾便有生機徵調時之蠲減略加休息卽同時雨臣承乏主計典在錢穀仰奉皇上明作之治一切督逋摘玩烈於夏日心未常不念之而兵與

餉浮勢固無如何也今者昊穹吝澤雲漢引痛祝網建韜昌言盈庭臣忝民部之官同田家之患所愧徵派相仍不獲盡弛以救焚灼覩此利病在案姑爲請命以慰雲霓謹度其時當急行勢實易行者臚成十事以備齋居之清囑焉一關薊經制宜定一秦晉災傷宜恤一賦役全書宜成一州縣火耗宜禁一省直壓徵宜仍一六七兩年舊餉宜蠲一內供錢糧鋪墊宜減一東江兵餉宜節一召買錢糧宜恤一追贓家屬宜豁以上十事或就臣部身受之窘力探要領或從諸臣啓事之餘共酌時艱於兵則願損有餘以待不足於民則願寬不足以釀有餘大約經制定而財力節招買充餉次第可減全



書修而征收清橫徵科斂一切皆塞從此雨師効順挽  
河洗兵庶幾加派襍徵全蠲有日此十事者所謂賜者  
之陰雲枯者之滴露也揆時度勢誠有不容稍緩者矣

### 題蠲錢糧疏

題爲聖主爲民求瘼等事臣頃因旱陳言臚列十事仰  
効芻蕘末議奉旨覽奏十款俱關籌兵裕餉恤民至計  
內薊島秦晉及賦役火耗等項已有屢旨招買量收本  
色卽如議飭行其舊餉應蠲鋪墊應減追贓應豁的着  
該衙門查明開列來看省直壓徵前著各撫按詳核歷  
來緣繇如何未見回奏還立限與他欽此查得蠲免天  
啓六七兩年舊餉一款恭繹明旨仁風雖已翔被窮黎

而宸慮似尙慎重者臣再閱冊立恩詔內開載一款省  
直本折錢糧自天啓七年以前除已徵在官及那移別  
用者仍照舊起解抵補外查果小民拖欠准與豁免我  
皇上固先已慨然允蠲矣而在官在民那移別用之隱  
情文移駁查經年累月尙無成議今懸揣該衙門開列  
不過曰實在民欠若干而在官那移與否無論後官旣  
不及知前官之事恐後官亦不能償前官之逋况積逋  
之案一旦傳聞議免再無完理而講求開造之際里胥  
因而需索科派竊謂臣部叅罰之數皆省直郡縣毫不  
肯虛認之數也百姓之所苦者在催徵而州縣之所苦  
者在彈射在有司顧此失彼勢必挖新以補舊在百姓



暮四朝三何如蠲舊而完新莫若查照覲冊未完之數直截盡蠲布告海內日戶部天啓六七年舊餉未完俱照冊立恩詔槩置勿問使百姓曉然於金石之令而有司亦不致前後瞻顧爲猾胥所愚以困苦百姓則蚤蠲一日蚤得一日之休息矣抑臣因是而並有請於六七年新餉之襍項也夫臣部日夕向省直禿頰而催聚訟而講者無非搜增於襍項之額外何敢議減於襍項之額中且臣與同官右侍郎周士樸題定帶徵載入考成催督矣疏墨尙鮮臣豈其善忘至此惟是天啓六七年省直襍項臣部徒虛執其籍至崇禎二年各地方始認有定額今欲以新定之額懸索未認之帳於三四

年前無論有司實應且憎而催者自催逋者自逋其何以信功令且也襍項最多者惟抽扣一項而抽扣實在舊餉之中今舊餉旣蠲則不得不併蠲襍項也不者我欲帶完六七年之二分而彼將割三四年之二分以應那東補西名完實欠况乎完者之寥寥也臣竊憶年來搜括之煩沃土亦鮮遺力叅罰之頻循吏幾無完膚凡可爲督逋計者臣部不憚儘力任怨而行之矣乃覲旋已久預徵尙多懸額時將季夏初限大半愆期豈有司之愚甘以其官爲射的而徂緩徵之小仁忘巖疆之大恤耶大都民間止有此物力寅支卯糧則卯年之逋勢也郡縣止有此敲朴趨新償舊則新額之逋亦勢也臣



愚不識進止妄謂欲急見額正當示寬舊額欲了近欠  
正當盡蠲久欠則從此見額之相續捷如流水或可計  
日而俟也比者秦晉災荒業已數年今天尙未悔禍頃  
復旱魃爲虐卽齊豫江北之區俱見告矣若必待其顛  
請而後蠲何如恩自上出者之足爲感動耶况遠年虛  
坐之襍項與實地徵收之加派固自不同又不患省直  
之覬覦倖免也謹將天啓六七兩年未完舊餉并天啓  
六七兩年未完襍項共銀五十二萬一千五百有奇開  
坐於後恭候聖裁其已徵收在官或起解在途者地方  
必有文案若故爲隱匿尅留者臣部得於訪聞定執白  
簡從事卽省直撫按亦自當據實簡查以聞也伏乞勅  
下臣部將天啓六七兩年恩詔內應赦舊餉照數豁免  
併六七兩年新餉內懸坐未認襍項照數停徵庶省直  
得一意完新而亦用以蘇息災黎矣奉 旨這天啓六  
七兩年各省直未完舊餉併襍項銀兩依議照數蠲免  
以示朝廷軫恤窮黎至意其有已徵及起解的仍着查  
明報部敢有乘機隱尅者定行重治

衰病難支疏

奏爲衰病難支曠疎可慮懇祈俯准休致以重國計事  
伏念臣智能本屬闇淺年力復已衰遲錢穀重務原非  
其據惟是奉命司計之日正值軍儲告匱之秋思君父  
方切焦勞豈臣子敢辭拮据星馳就列宵旦經營尋以



寇逼門庭羽書旁午義重身輕勉力撐持雖經投劾乞  
身未忍恣然長往蓋犬馬戀主之心臣所自盟者素矣  
無奈自入春夏以來福過災生形衰體憊夙疾纏綿惴  
惴焉有性命之憂現今頭臚暈眩痰涎壅盛目力昏眊  
於簡閱足力顛躓於步履腕力痛楚於批答尤苦心血  
耗盡恍惚健忘頃者司屬題覆每多踈誤實臣失於簡  
點之故設精神尙能照管何敢自蹈迷謬之愆則臣神  
衰力竭之明證矣雖蒙皇上貸臣朽拙而并寬臣司屬  
然循省失職於既往豈堪復悠忽於將來度支何官今  
茲何時而可容優游疎曠爲也敵氛未靖於東西財賦  
已窮於輸輓邊鎮多疾聲而呼持籌有仰屋而歎卽令

精明強幹者處此猶虞展布之難况以衰殘多病之臣  
當之委頓已極鞭策安施儻文移一日不批發則諸司  
職掌寧無廢閣儻積案一日不料理則科抄部牘未免  
塵蒙臣病體之支離日深一日則臣部務之叢脞當日  
甚一日將來無窮之罪案必有百倍於目前之舛錯者  
是臣不能致身以爲國而徒貪位以誤國也是皇上原  
欲用臣以裕國計而反因臣以誤國計也况臣犬馬之  
齒已屆踰六望七之時不爲不老矣馳驅中外廻翔南  
北已四十載不爲不久矣從前溺職欲補過以無期向  
後譬尤恐擢髮而難數與其自甘頑鈍而無補於國何  
如亟請罷斥而避賢者路此臣所爲情迫勢窮而哀籲



於皇上之前者也伏祈鑒臣衰病餘生放歸田里別選  
賢才以經國用臣卽以身填溝壑有餘快矣奉 旨卿  
清勤詳練精力正優計務殷煩亟資籌畫何乃輒有引  
請著卽出視事毋得少延

再懇休致疏

奏爲微臣衰病情真國計不堪久誤再懇天恩立賜休  
致以明止足事念臣受才鄙劣賦性顛愚偶遭遇於熙  
明遂承乏於邦計宿昔少健黔驢之技已窮今茲病衰  
駑駘之步安騁乃蒙明旨獎臣清勤詳練是猶以優容  
待臣也責臣卽出視事是又以鞭策望臣也臣實聞命  
驚慚不勝隕越夫臣自崇禎元年八月待臯計曹事皇

上最久而受恩遇最深儻自揣精力尙有一綫可支臣  
亦何敢言去何忍言去無奈筋骸衰憊精神瞶昏不惟  
回視壯年之時全非其故抑且較諸受事之始大不如  
前入夏以來痰火壅盛眩暈時作每遇朝祭大禮起拜  
艱難常虞顛躓卽微倖未至失儀而將來已有萬不能  
支之勢矣錢穀重大文移浩繁徃徃目披閱而心輒遺  
忘寧免掛一漏萬手批註而筆多謬誤何辭襲舛承訛  
此其叢脞曠廢匪止一身一家之事也此時不急引身  
求去丐皇上早擇壯年心計之臣以代之必至誤國家  
之軍實遺封疆之隱憂彼時卽以身膏斧鑕何益乎且  
臣佩服主憂臣辱之訓其當去而不克去欲去而不卽



去者固已久矣客秋敵退之後惴惴焉虞其復至未敢  
瀆請今春外解中斷兵餉莫繼亦不敢堅請姑且忍死  
以待茲邊方漸見喙息而新舊二餉亦庶幾按月接濟  
矣此正微臣可以乞殘骸之日而亦皇上可以賜帷蓋  
之時也臣以四十年犬馬環顧朝班同籍已盡若猶貪  
戀而不休勢必顛隳而莫救憶臣司計之始比肩同籍  
尙有部臣王永光李騰芳喬允升憲臣曹于汴四人今  
騰芳允升一物故於允放之日一物故於恩譴之餘惟  
永光于汴俱以年老得請而去皇上若不以宥永光于  
汴者宥臣臣亦必爲騰芳允升之續臣卽欲希致身之  
義慕盡瘁之忠然臣之年已爲鐘鳴漏盡之年臣之身  
已爲石火電光之身矣尸位而曠官悞身以悞國臣罪  
滋重將無可贖惟冀皇上惻然憐之而已矣伏乞皇上  
推天地之仁垂日月之照電臣年果衰遲病非矯飾立  
賜休致別選賢能以經國用臣得以病苦餘年養病待  
盡惟有祝聖壽於萬年已耳奉 旨卿忠勤籌國年力  
方強朕所鑒悉前諭已明何乃又有此奏着遵旨速出  
料理勿以陳請致稽部務

微臣衰朽疏

奏爲微臣衰朽多罪人言再及懇祈天恩蚤賜罷斥以  
重國計以全晚節事竊照臣以衰病孱軀久濫計部深  
惟綆短汲深大懼覆餗負乘比來無歲不具疏請告荷



蒙聖恩不卽棄捐俯賜勉留不曰邊計方殷則曰軍儲正急不曰遵旨卽出則曰宜遵屢旨論進退之大閑自當亟去揆君臣之大義未忍恣然良以邊境未寧誠不敢獨以憂勞貽君父也明綸有赫又不敢輒以徑率負國恩也犬馬尙知戀主微臣敢求弛擔以故覲顏復出料理計務今戴星出入者又四十日雖病困支離終忍死以待今閏十一月初九日早朝事竣甫出西長安門陡覺痰壅嘔逆昏暈移時已而寒熱大作猶勉強扶掖入署薄暮回寓僵仆兩日尙無起色忽見邸報則御史余應桂於時事艱危已甚疏中又指摘及臣矣言念四郊多壘國計至重自揣昏耄已甚真覺溺職堪羞臣久自分當去臺臣亦謂戀不卽去則臣安可須臾留也夫人臣之所恃以効職者才具也臣自待臯仕版垂四十年僅有一腔樸誠慙無救時許謨邇歲加派頻仍而民生坐見其困憊供億繁夥而士馬未見其飽騰旣不能開源又不能節流致煩聖主焦勞文華召對深以諸臣不能實心幹濟爲憂乃幹濟宜無重於計務者臣當媿死顧臣心雖不敢不實而臣才若已限自天是以求具按之而知亟當去也人臣之所恃以自靖者精力也臣以踰六望七之年心血耗盡無復旺之日勛力衰盡無復健之期二豎已入膏肓竭蹶不前精神益復潰亂錯悞時出從此智慮日短一日籌策亦日疎一日雖欲勉



強支吾祗恐過有增加罪難取贖是以精力度之而又  
亟當去也人臣之所憑以自立於朝者惟此去就之節  
止足之義也是必內無媿怍而後外可展布臣自八月  
以來猥以席藁負罪之身尚儼然爲農部之長雖蒙聖  
恩優容濫點朝班而方寸不容自昧衾影未免懷慙卽  
無人言已難就列而况誚讓加之又頑鈍啞之矣尙可  
貪位慕祿俾令廉耻掃地乎是以禮義衡之而又亟當  
去也綢繆桑土惟此其時國計持籌豈容少稽皇上若  
緩臣一日之罪斥是多臣一日之曠官萬一貽患封疆  
重誤軍國臣不足惜如國家大事何目今師濟盈廷壯  
年心計正不乏人奈何以臣衰病多罪之身妨賢者路

臣卽不敢爲一身慮誠不得不爲國計慮矣伏望憐臣  
衰病原非矯飾念臣罪釁終難自贖鑒臣瘵曠實招人  
言察臣求退總繇血誠亟將臣愚禡職罷斥別簡賢能  
整頓部務但得邦計有托臣雖身膏斧鑕無憾也奉  
旨計務殷煩卿才猷敏練正資幹濟何乃又有陳請着  
卽出安心任事

衰病不堪疏

奏爲衰病不堪 邦計多罪義難久留再懇聖慈矜  
察立賜罷譴事竊念臣駑鈍已極而尙許以敏練昏耗  
已章而猶望其幹濟旣惕以計務殷煩又慰以安心任  
事此真覆載弘慈非臣捐糜頂踵所可報稱萬分一也



獨是人臣之誼無以有已然疾痛之甚必且呼天臣實有萬難就列之義而敢惜哀鳴於皇上之前乎臣至愚極陋因緣際會忝竊非據久濫計務屢疏乞骸未荷允放罪因病而益增補救無術病因罪而益劇痊可無日當鐘鳴漏盡之時懷跼天踏地之心是臣以不去而使骸骨無首丘之望也其當亟去一也覲顏再出物議交加雖屢荷聖慈優容實無道人言指摘至以不聽臣去歸咎輔臣是臣以不去而累輔臣有比周之名也其當亟去二也方今供億正殷而臣以駑馬疲牛勉供驅策前此已多溺職之訐後此愈深負乘之罪是臣以不去而將來之貽患封疆者更不知所底止也其當亟去三

也至於微臣拊心知疚顧影自憎非特外無以對清議而實內無以愜獨知則尤中夜徬徨以仰負聖明爲耻蓋我皇上神明天縱之主也當臨御之初季卽孜孜以國計民生爲首務而拔擢及臣所期望於臣者良厚矣臣待罪以來四年於茲其受皇上恩遇又良久矣奈臣質性旣庸年力復憊旣未講生財之大道復不諳救時之良方今邊儲宜裕而不能裕俾塞上金錢有捉襟露肘之憂者臣罪也民瘼宜卹而不能卹俾海內蒼黎有剜肉醫瘡之苦者臣罪也皇上振飭臣工肅法宜從臣始儻蒙聖慈寬其衰耄不加斧鉞已爲萬幸若臣仍復依回澆忍尸位曠官使天下萬世謂皇上有堯舜之資



徒以優容一衰殘多罪之臣主計非人不能致治理於  
三代是臣以不去而終負皇上也非獨皇上之罪人實  
天下萬世之罪人也此尤臣自揣負罪已深而冀以一  
忝自贖者也伏望鑒臣苦情亟行罷譴簡用新員資其  
朝氣皇上圖治若渴必有救時名臣應運而出者言念  
及斯而臣之求忝固已後矣統惟皇上睿照速賜乾斷  
施行奉 旨卿老成勤練邊計方殷正宜悉心籌畫以  
副委任何乃屢疏引請還遵旨卽出視事毋得再陳

國計不容重誤疏

奏爲國計不容重誤罪臣萬難供職三懇天恩垂憐蚤  
賜褫斥事竊念臣待罪度支汲深綆短譬尤日積衰病

日深邊計方殷嗟籌畫之無策委任未効豈勤練之足  
稱猥荷聖明獎詔勉留浩蕩深恩隕首莫報臣非木石  
何敢愆然必忝瀆聒天聽惟是今日任最大而責最重  
者無踰計務而臣冒昧肩任已四年矣臣幼讀書至大  
學之末章論平天下而惓惓於理財一事儒者以爲末  
務而在今日則本計也臣徒能讀聖賢之書而不能推  
明其理以致之用所謂生衆食寡爲疾用舒者臣迄今  
思之茫然未得要領也卽今屯田鹽法鼓鑄等項皆理  
財窾會臣殫力圖之渺焉未收寸効也三空自如一籌  
莫展捉襟而露肘恒苦挹注之艱膠柱以調絃難逃交  
徧之謫臣雖黽勉拮据矢心清謹而終無裨益於軍國



之大計究竟一庸衆人耳天下之大豈其少一庸衆人  
而久居高位計務之重豈堪付一庸衆人而猥令曠瘵  
皇上試數九列中有尸位最久如臣者乎有奉職無狀  
如臣者乎加以頽憊已甚昏聩轉增常恐狗馬顛眩早  
填溝壑未病尙難撐持已病何堪料理因念從來帝王  
治世固重責臣下以事功而尤厚繩臣下以廉耻卽如  
久任一法原用以督課責成非欲姑容不肖也臣部職  
掌天下財賦徵輸郡國供億九邊一切督撫臺省章疏  
多下臣部題覆斟酌衡量以歸於當臣以衰病之軀屢  
掛人言物望愈輕頑鈍貽譏何以稱喉舌之司持出入  
之平而得免於挪揄乎其有褻國體也多矣臣抱病待

臯倏已半月一切緊急政務間於臥榻了之然司屬未  
免懈弛案牘未免塵閣豈其前所終日屹屹而不足者  
今乃高臥爲理而有餘哉言念及此芒負在躬若罷譴  
再遲一日則曠瘵更多一日必俟叢脞已極而後治臣  
之罪雖萬死不足贖矣瀝膽哀鳴一字一血惟蚤禡斥  
少道臯辜或謂撫賞一事屢奉明旨切責見在清覈臣  
今求太似涉規避臣願乞恩革職聽勘暫棲旅舍俟查  
覈後果有朦發分肥等弊臣願甘伏斧鉞之誅萬一得  
免於戾而後放歸田里未晚也總期目前無誤國計末  
路少存廉耻則萬幸矣奉 旨前有旨諭卿卽出何乃  
又有此奏國計甚重大臣當祇遵君命力圖幹濟何得



以私情屢請

新餉出入大數疏

題爲遵旨查奏一切新餉出入大數仰祈聖鑒事該本部題爲欽遵召諭事奉旨據奏新舊加派及雜項等銀歲額至九百餘萬餉非不多乃匱詘日甚士馬愈弱總因兵虛餉冒錮弊相沿若非通長打筭徹底清釐邊計何賴其一切出入項款併遼東原有舊餉逐一開列總撒另本來看該部久任專責不得瞻徇隱漏欽此該臣看得國家計兵授餉出入原欲相準當遼陽全盛之日以京民運數十餘萬養之有餘迨於今茲罄海內全副物力殫有司全副精神供之不足非盡繇餉額缺也敵

無所不可攻我無所不當守有非時之出無按時之入雖量入爲出兢兢不敢輕下一籌而紛揉凌襍不能以一盤打就勢使然也憶元年戊辰秋各鎮欠餉數月致有寧遠索餉之變臣承乏其後憂心如惓因取原議雜項九款而核之強半名存實無遂力破情面疏請皇上責省直司府自認已復駁令再認始有定額以至割裂之島餉充餉多用之登餉粵東題留之鹽課南京久假之事例贛州久據之橋稅新舊爭持遼鎮之京運民運皆從蠹案殘牘中視爲塵飯畫餅者臣不憚敝舌禿頰掇拾講求指作療饑之款彙成出入大數具題奉旨覽奏新餉昨歲缺額一百二十五萬今入額稍寬具見卿



持籌苦心但省直完欠不一還嚴覈考成及節浮剔弊查解等項俱逐一詳飭行欽此當是時客兵各已實伍主兵銳意汰弱以崇禎三年爲始約計歲入五百一十六萬五百五十八兩有奇約計歲出五百一十三萬八百八十六兩有奇尙剩額銀二萬九千六百七十一兩有奇假令征調不興催科無逋雖至今遵守可也未幾而城守防援芻料輦運犒享行月之費悉索新庫殆不能支加以勤王應募之旅版築繕修之役要求奢望各督撫鎮將亦遂懲羨吹噓不問餉所自來臣始大困無策前此每遇警餉缺盈廷呼號請發帑金歲或百萬或數十萬不等以濟匱乏臣旣不敢比例叫閹以危詞煩

聖慮又不能籲天雨金以謬巧慰兵饑不得已勉力支撐矢心任怨所賴幸免脫巾者籲差京卿以催積逋籲勸輸以助涓涘籲那借輕齎漕折等項以救一時之急三年秋冬積欠轉至計吏雲集各以地方應輸餉額凜凜期會新庫稍覺寬餘臣乃按月奏發然而四年入額亦暗爲侵透多矣何也三年預徵已透用過十分之三四年償逋如商價輕賚以及找發未完之招買腳價等項又已代還去十分之二此四年所繇患不足也今約正襍并額外款項歲共入數八百三十八萬二千六百九十三兩有奇本年六月以前援兵未撤兼支頗冗未敢據爲出數今但就近來已定未定之經制叅諸餉冊



實之在支放歲約出數七百一十八萬一千四百八十二兩零出入相配尙有溢額一百二十餘萬於以抵海陸二運招買價值之偶浮及一切意外不經之冗費似可勉爲支持矣雖然入數亦未可恃也無論南部事例久假不歸南工蘆課有征無解上杭河稅閩粵互推撫按派餉新從減定幾同止渴之梅卽鹽課一項兩淮附近欠至六十餘萬屢奉明旨責成如生員優免亦尙報解參差且原議扣足三年卽止則亦非不涸之源也其實應手者惟有新舊加派之五百二十二萬九千六百五十餘兩九款襍項之九十六萬七千七百八十餘兩而海內民力已竭有司叅罰幾窮水旱盜賊之不時安能保無逋賦且出數亦未可必也臣部三年七月所陳出入疏內開薊鎮歲額止二十四萬今歲支至一百五十萬餘兩尙繇茲邊防克鞏則可藉以充供億而望騰飽國計幸甚臣部幸甚不然者後之視今猶今之視昔將加派襍項之外更操何術點金則臣之所大恐也

### 舊餉出入大數疏

題爲遵旨查奏一切軍儲出入大數仰祈聖鑒事臣捧繹明綸仰窺聖慮運量籌畫備極淵深故以一切出入仍責臣部披陳也臣已將新餉出入敷陳睿覽矣然竊思新餉之出數難憑則以意外之防援不測新餉之入數難定則有地畝之加派可增若舊餉之出入大都皆



成數也太倉止此額入京邊止此額出間遇欽賞賑濟等項或有意外之費然爲數亦不甚夥裒益宜有成算顧乃日匱月縮捉襟肘見者則出入之大數原不相敵也今查九邊額餉歲計共三百一十八萬一千二百九十七兩九錢零此舊餉之出數也在京雜支歲計銀七十九萬六千九百六十兩六錢零薊遼撫賞俱在其內此京支之出數也合舊餉京支共歲出銀三百九十七萬八千二百五十八兩五錢零而太倉之出數備是矣各省直歲入京邊共銀一百五十四萬二千八百六十九兩八錢零各運司歲入鹽課共銀一百八萬三千六百四十三兩九錢零撫按司道贓罰共銀一十萬二千

七百五十兩四錢內外事例逐月盈縮不等共約可得銀一十二萬兩各鈔關稅課共銀二十萬六百九十二兩五錢省直及京衛荒田備邊等銀約七萬五千二百七十三兩零以上共計銀三百一十二萬五千二百二十九兩六錢零此額設舊餉所入之數也其議補缺額者如會議二十款約得銀二十萬二千一百四十六兩四錢零裁汰冗官冗役俸薪工食約得銀一十三萬二千一百六十六兩零裁減賦役全書內約得銀三十九萬一千九百六十兩零節裁遵化民兵工食歸入太倉銀一萬五千兩四項共銀七十四萬一千二百七十二兩四錢零此議補舊餉所入之數也合額設議補共歲



入銀三百八十六萬六千五百二兩零而太倉之入數  
備是矣以所入較所出入不敷出者尙缺一十一萬一  
千七百五十六兩五錢有奇客歲仰蒙皇上洞見舊餉  
之窮慨允輕贖銀內循例動支十萬兩以補邊餉缺額  
又會議內有南馬協濟一項約銀十萬餘兩合此二項  
質之太倉出數差可相符乃輕贖十萬客歲止得五萬  
兩湊給邊餉其一半竟苦弗繼近該總督倉場題充京  
軍米折之用恐此後并一半不可得也南馬協濟奉旨  
抵補正數今兵部仍執留買馬矣初議原以各鎮節曠  
料草盡還臣部充餉今又成畫餅矣去此二項則缺額  
之十一萬一千有奇遂成絕望臣等較量至此不覺智

盡能索惟有仰屋攢眉耳雖然歲出者其可須臾緩乎  
歲入者其可刻舟求乎以歲出言之邊餉措發少後則  
庚癸頻呼京支給散逾期則闕議踵至臣部瓶罄罍耻  
之狀上可矜原於宸衷下不能見信於衆口也况近經  
題准每歲補還京糧以二萬計而各鎮呼籲間有找補  
壓欠近如延綏薊鎮等處亦歲以五六萬計又有出於  
常額之外者是則出額尙未可限量也以歲入言之京  
邊屬維正之供而年歲豐歉不一能保水旱灾疫之不  
上聞贓罰係額助之數而撫按交代愆期能保先後扣  
日之無缺額鹽課居邊餉之半而兩淮積引屢告能保  
額課徵解之盡如常至事例之所入招徠雖開項欵援



石隱園藏書  
五  
納聽之四方兼以選法壅滯裹足不前一月之中所入止萬餘金且水衡又分其半是則入額尙未有實際也若夫議補缺額者如汰冗如會議如賦役全書雖就公家自有之財內外稍一酌濟然舉行方新其起解到部者十不一二又况會議諸款其在江西咨催年餘尙未報到乎又若賦役銀兩雖經臣部侍郎康新民據省直之開報磨勘再三始有成額行令省直造冊認報而亦十九未至則猶然西江之水也臣部何所恃以無恐耶所冀原設銀項省直轉輸以時源源不絕而司兵司餉之臣加意清覈時有樽節勿溢原額勿索舊逋庶幾猶可撐持於萬一耳抑臣於舊餉出入每嘆古今之不相

及焉國初洪永以來原無年例而年例之設創自正統年間每歲共止發四十六萬餘耳隆萬以後武備愈弛年例愈增浸淫以至崇禎元年共用邊餉三百五十餘萬則取數愈煩而措辦愈艱矣且也萬曆年間累朝之積蓄甚饒軍興之供億不乏維時臣部老庫以八百萬計厠庫以九百萬計故九邊額餉胥借資其中迨至今日便已蕩然無餘此各邊之所以呼籲頻仍而臣部之所爲勛力俱殫者也查祖制邊餉惟借民運屯糧鹽糧三項耳民運徑自解鎮悉充正供鹽引輸粟塞下便給軍食若屯糧之設卽唐之府兵寓兵於農之意聖祖養兵百萬不費民間一粟者也至於京運祇以接濟民屯



之不逮號曰濟邊臣查九邊額派民屯以供給軍餉者歲共二百九十四萬六千四百兩有零爲數不貲因糧於地而餉不煩於轉輸計口授食而軍不令其缺望於至善也逮鹽法初意漸失民屯積欠無算遂致各邊并引領於太倉尤可異者邊臣於民屯之欠不加督催而於京運之數偏勤呼籲豈京運真天降而地出耶亦不過民運之解京者耳近因秦晉災荒寇盜充斥民屯一無可恃而徒仰給京運臣部雖勉強補苴支持目前然太倉金錢有限猶是不終日之算竊恐循此而無變計雖再增京運數十萬亦無益於飽騰之數也瞻軍自有大道足邊更無奇策舍民屯鹽法外其道無繇矣事關邊計宜求本源敢因恭報舊餉出入大數而并及之

痰暈陡發疏

奏爲痰暈陡發病勢貼危懇乞天恩給假調理事臣一介草茅至愚極陋仰荷聖明優容竊祿四十餘年頃以桑榆暮景待臯計曹又已五載汲深綆短自知甚明先是屢疏乞休輒奉慰留責以大義臣捫心惶汗犬馬戀主匪第義無所逃真自情不容忍用是不顧衰憊努力供職所謂一息尙存此志不容少懈者也數月以來拮据部務蚤入晏出率以爲嘗但臣素患痰火眩暈兼苦下部酸軟每遇朝祭大典惴惴以傾覆爲慮忍死強支幸未失儀頃以關寧薊密等處兵馬錢糧經制奉旨合



奏督撫查報已到兵部會議再三不容更緩每日公同  
司官劉鎬謝肇玄督率吏書磨勘銷筭具疏題覆甫獲  
脫稿正畫題繕寫間二十四日酉刻出署纔自火房行  
至後堂陡爾昏暈仆地不省人事班役扶掖灌救良久  
方醒乃始攙扶歸寓又復昏暈如前家人輩驚慌啼泣  
急延醫官韓恭伯診視投以搜風化痰湯劑終苦頭目  
昏眩手足麻木幾不知四大之爲我有而計務之尙在  
其躬也延至次早連進前藥猶覺手不能執筆足不能  
履地蓋臣以踰六望七之年黽勉撐持不謂一蹶不振  
如此力疾弗克入部內省倍覺瘵官輒用哀籲聖明乞  
假調理萬一稍有起色卽圖鞠躬盡瘁若果病入膏肓  
再容叩闕乞骸臣病困中口占具奏萬冀天恩俯俞殘  
喘幸甚奉 旨時艱甚劇兵食方殷卿以勤練持籌屢  
旨自悉正當一意急公何得輒懷弛卸着卽出視事不  
必請假

積痾難痊疏

奏爲積痾難痊叢脞可虞報主有心延生無計懇祈聖  
明矜憐允放以無重誤國計事竊念臣昏眊已甚臯過  
已深幸荷聖明包荒得道斧鑕無奈衰病侵尋大慮曠  
瘵勤練之稱實非臣所克堪也弛卸之念尤非臣所敢  
萌也正爲時艱身瘁亟須引退以避賢路豈緣軍興餉  
棘希圖自便而昧急公惟是臣本豎儒力綿任鉅久玷



計曹心血盡枯以故元氣凋殘肢體困憊膏肓之疾一  
發而不可救藥連日延醫診視僉謂標本俱病氣血兩  
傷委非一朝一夕之積卽今痰涎壅盛嗽聲不絕床褥  
呻吟痿痺已著臣誠貿貿自失且惴惴知懼也今日何  
時主計何官非得精明強幹之身決難勝任如臣真衰  
真病人所共見共聞尙可嘗試而漫爲乎蓋葵心向日  
何忍輕棄於清時而蒲質經秋莫能自必其殘喘微臣  
雖欲再竭犬馬之力而已萬萬不能矣皇上雖欲收臣  
桑榆之効而亦萬萬無望矣臣平日顧軍國不暇顧性  
命今日悞性命且以悞軍國伏乞聖明矜憐允放早擇  
英賢料理計務臣雖溘先朝露猶瞑目無憾也奉 旨

前旨諭卿已明何復有此奏若時事艱虞大臣輒托疾  
規卸更望何人幹濟着卽出視事不得再陳

### 臣病實深疏

奏爲臣病實深聞命增懼謹遵旨力疾勉出以明分義  
事夫平居而竊祿時艱而掉臂則不忠不敬莫大乎是  
有臣如此將安用之審果若斯何辭斧鑕但臣年齒向  
頽二豎相侵痰喘交攻一病垂死昕夕昏暈如墮雲霧  
方今時事倥傯稍遲一刻則立誤機宜頭緒紛紜稍乖  
一著卽坐基事變似此形神狼狽何能曲計盈縮深媿  
鈍頑久妨賢路蚤計國以罷臣無羈臣以誤國實區區  
下願也迺蒙聖慈優渥明綸煥頒惕以艱虞責以規卸



似謂老馬尙可識途不忍餘生遽爾填壑臣揣力業已殫竭而枯詞實難再瀆蓋恩重如山卽捐糜何足言報而義等逃雨將軀命轉見爲輕臣於此時雖病危而不敢言病雖宜去而不敢言去稍幸杜門以來荏苒旬餘藥裹時親畧有起色只得力疾竭蹶謝恩入部若其微倖小愈或可勉支數月時事少寧再圖乞骸萬一大命近止溘先朝露要畢微臣致身之義而止今固難以預料也奉 旨覽卿奏已遵旨視事具見恪慎邊計方殷還悉心詳籌節裕長策以資撻伐用付委任

真衰真病疏

奏爲微臣真衰真病萬不能支懇乞聖慈蚤賜允放以

正首丘以無悞邦計事竊照臣以至愚極陋承乏主計拮据五載尺寸靡効先是以衰病乞休者屢矣猥荷天恩浩蕩或切責或諭留雷霆雨露總屬生成自今年三月初旬上章請罷奉有時事艱虞托疾規卸之旨臣實凜凜斧鉞雖疾疢之在體惟忍死以撐持每誦古人所稱鞠躬盡瘁以爲法程今又八月餘矣但臣之所恃以致身者精神筋力爲國家宣勞任事耳臣年踰六望七力綿任重百憂感其中萬事勞其形蓋精神已竭而又竭筋力已憊而又憊矣然使二豎不深庶幾一息尙存臣猶未敢愬然言去也不意忽於本月十二十三日偶感新寒遂發錮疾痰火爲祟寒熱交作滿面浮腫潰裂



成瘡顧十九日猶力疾入朝二十日猶扶掖進署與臣同官及各司屬商略南北之災荒籌計齊豫之軍饟人多見而憐之臣尙未敢自逸倏而昏暈僵仆半日方甦迄今一遇風寒痛如刀割手足麻木跬步艱難只得跽伏私寓延醫調理醫家見臣病危率多望而卻走大都皆謂心血耗竭虛火壅於上焦脾胃衰微真氣涸於中尙投之涼劑則洞泄投之溫劑則喘哮言念及此則微臣性命之憂真在頃刻旦暮間耳臣若偃卧一日則廢一日之千條萬緒臣若視事一刻又苦一刻之神眩目迷非乞帷蓋之特恩聽之反初服而親藥餌必致風燭之偷蔭終至遭禍釁而誤儲精是國與身兩無當也伏

惟皇上憐臣真衰真病毫無矯飾立賜允放俾正首丘則覆幬鴻慈奕世不朽矣奉 旨卿練習精勤邦計深賴軍興方亟全藉轉輸着卽出安心視事不得以病陳請致有曠悞

### 臣病轉深疏

奏爲臣病轉深臣職愈曠再懇聖慈矜放以全餘生以重國計事竊念臣猥以愚劣久濫度支譬諸庭羸之夫而任烏獲之重不格明矣目今徵調四出旣苦軍儲未克災傷叠見復憂民生告瘁臣拊心自揣負乘已多而明綸猶許以練習天語且獎以精勤華袞游加慰留備至犬馬尙知戀主頂踵何足言酬第臣福過災生患症



危篤初爲風邪所襲加以痰火鬱結數日以來神益銷  
耗狀益決裂面瘡初雖皴痂五官尙未盡失今且舌焦  
唇破頭面一槩浮腫潰腐膿潰卽欲於榻前批發日行  
文移而目無一線之明頭涔涔痛眩不可忍舉筆而隨  
以僵暈矣夫陰陽之疹發乎面動乎形蒸爲瘡毒此衆  
目所共見非若他症猶可矯稱粉飾者也臣以桑榆暮  
景遭此惡疾精神恍惚藥石靡効如失楫之舟汎汎無  
所棲泊又決非旦夕可望痊安者也明旨戒臣不得以  
陳請曠悞而荏苒數日其所曠悞者多矣臣之一身卽  
令溘先朝露固不足惜其如軍國出入大計何蓋負薪  
地曹臣久汗顏於覆餗而延喘鷄行人且掩口於戀棧

皇上亦何愛一困頓哀憊之夫而不予之生還哉伏祈  
皇上憐臣萬不得已之情萬不能支之勢一字無飾慨  
賜允放儻得生入里門使樵夫牧豎知聖朝不棄四十  
年簪履之舊臣實浩蕩之特恩也若以臣久玷計席茲  
復成殘廢譴責斥逐亦所甘心臣病深情迫語無倫次  
冀惟皇上矜宥施行奉 旨軍需正亟部務殷煩前旨  
諭卿已明着恪遵卽出視事不得再稽

病已垂危疏

奏爲微臣病已垂危力難再出謹忍死哀鳴以希旦夕  
之生以逭瘵曠之咎事竊念臣衰病已極迺聖恩尙眷  
留無已臣非木石豈不知感會計至重且明旨戒不得



再稽臣有心胸寧不知懼第臣於床褥呻吟中再四思  
維儻痊可有期自當匍匐以承君命如殘喘可續何辭  
竭蹶以供臣職惟是狗馬之症與日俱進漸入膏肓茫  
無起色一切衰憊昏暈之苦龍鍾潰裂之狀見之駭目  
聞者傷心已自分旦晚化爲異物安得不控顛以乞皇  
仁臣卽從今飄然遄往亦恐不能生入里門矣况臣部  
日行批發文移題覆章奏累累克斥關係重大稍不經  
心經目動有舛錯居恒每延見司屬悉心商確今直僵  
臥斗室居恒必翻閱卷案殫慮勞晝今且都付塵封知  
識昏眊耳目聵塞國計之煩重如彼而臣病之阡危若  
此爲是中心如焚火愈熾而水愈涸遍體沉疴背若芒

而坐若針雖欲勉進藥餌餽粥亦萬不能下咽矣皇上  
以軍需正亟詔臣之出而臣則以孱軀當軍需之亟而  
不得不去皇上以部務殷煩詔臣之出而臣則以病體  
膺部務之殷而不得不去緣臣待臯五載夙夜徬徨伎  
倆已窮襟肘盡露前未衰時猶不如人况已衰之甚乎  
前未病時猶無寸長况已病之甚乎是留之固頌皇上  
簪履之洪恩而於臣積有丘山之誓負罪滋深放之實  
感皇上帷蓋之大慈而使臣得偷旦夕之生戴德何極  
臣所爲忍死哀鳴者言止此矣伏祈皇上速簡精力強  
固才幹優長大臣主持邦計或先行委署將臣立賜罷  
斥以爲庸老衰病不堪重任之戒微臣犬馬之報願矢



於奕世矣奉 旨大臣宜以君命國事爲重卿素著勤恪何得不遵屢旨尙爾托陳着卽出視事勿再稽延

臣病千真疏

奏爲臣病千真萬真絕無矯飾恭承明旨督責不勝惶懼再祈賜假調理徐圖進止事竊念君恩至重頂踵難酬國計紛紜時刻難誤臣叨冒四朝豢養馳驅四十載風塵勿欺二字歷終身如一日豈今日敢有托陳媚茲一念亦終身如一日豈今日遂甘愆然祇以忍死須臾之身無能仰佐廟謨萬一匪漫附於知止知足實深懼夫負國負君是用頻灑血誠待瞑里門耳茲荷聖明責以不遵屢旨諭以勿再稽延臣誠悚惕天威措身無地

奈臣景入桑榆數復屯蹇旬日以來延請醫官傅懋光等內外交攻標本襍治以藥餌代梁肉以扶掖爲步履深欲幾幸損疾之吉而終不可得也間遇緊急公移章奏或召書胥直入卧內僉押用卽唾涕污穢面目瘡毒惡疾難掩醜態畢露時而昏暈如醉時而切齒忍痛支離自憐塗面不堪二豎旣已爲祟五官因而不靈似此萬分沉痾之夫豈堪尙擔會計之重臣雖欲力疾視事仰答君恩而天若限之人且奈何爲此萬不得已仰丐皇上鴻慈憐臣病困已極俯賜寬假調理儻徼聖主之寵靈臣狗馬病軀漸有起色自當報名廷謝入部視事若其潦倒如昨跬步難前然後再申前請積至誠以動



天聽庶進退不至於狼狽而風燭胥荷於生成矣奉  
旨計務殷煩卿還遵屢旨速出不必請假

沉痾轉劇疏

奏爲微臣視事未幾沉痾轉劇欲去不敢言去欲支不  
能強支懇乞天恩俯賜寬假以便調理事臣衰病已極  
荷蒙聖恩不卽棄捐乞休未允乞假未允感君命之爲  
重覺性命之爲輕故不得已自本月十二日力疾再出  
意謂畢此餘生以仰答知遇又謂幾幸損疾以再効驅  
策不意衰朽之年一病而諸症交作入署甫經半月且  
日深日變也先是臣病爲鬱熱所激面口赤腫潰裂爲  
瘡頭目昏眩寒熱間作蓋元氣虛而邪氣勝也繼以寒

涼之藥投之脾胃作瀉飲食不尅矣又以發散之劑投  
之五內怔忡子夜不寐變爲自汗盜汗等症晨起若冰  
霜之透於肌骨矣從前精力頓減十九蓋邪未伏而元  
氣愈虛也臣以衰齡而得此疾大類不起之症用是寢  
憂寢懼而又國計在躬未敢靜攝目今謝絕人事謝絕  
賓客止留一副精神付之軍國入署而定喘息者數時  
乃展閱案牘而精神復爾昏暈抵寓而貼床褥者數時  
乃二豎膏肓而徹夜又不安眠諸醫屢試藥餌無靈河  
魚腹疾臣自知之若面孔若步履若氣色則自班聯以  
至輿隸人共見之矣臣撫躬自悼蚤夜思維躊躇欲去  
而明綸方沛斧鉞有赫豈臣子肆志之時低回欲留而



國計至重沉痾難痊豈隱忍支吾之日無奈冒瀆天聽  
容臣寬假調理別委侍郎一員署印倘徼皇上之靈得  
不溘先朝露當再鞠躬盡瘁以報國恩不然而病實爲  
之臣力無如之何臣心無如之何皇上卽不遺簪履其  
能淹臣之風燭也臣冒死陳情毫無矯飾伏惟聖明垂  
聽焉奉 旨卿司計勤恪偶恙着暫調卽出以副委任  
印不必請署

病勢委頓疏

奏爲微臣病勢委頓醫藥罔功部務殷繁萬難卧治再  
懇天恩垂憐允放以無誤國計事竊念臣待罪計曹碌  
碌五載每遇疾痛未嘗不迫以呼天然而寒暑爲祟藥  
餌尙靈未有表裏受症如今日委頓之甚者也臣前四  
疏乞休荷蒙屢旨慰留臣不敢顧惜微軀辜負高厚扶  
病入署面腫唇裂之狀同官司屬無不見而憐之食少  
事繁勞觸疾劇更變爲盜汗自汗勞瘵虛怯之症萬難  
支撐乃又具疏仰控尙不忍恣然求去但請委署寬假  
調理亦幾幸旦暮可起圖報聖恩萬分一也卽明旨不  
允署印止容暫調或亦憐臣狗馬之軀未必卽填溝壑  
尙堪收駑力於桑榆也覆載鴻恩幸未棄臣犬馬戀主  
豈甘自棄無奈福薄災甚日憊一日杜門以來又將浹  
旬更方易藥十無一効病在頭目欲宣其表而虛汗浙  
瀝寒噤不寐病在毛孔欲固其裏而虛火上炎眩掉如



脊不惟面目可憎已成廢疾抑且神情盡脫幾爲異物兼以脾土下陷中氣閉塞痰嗽不絕奄奄待斃臣所以一旦危篤至此者緣臣性癡認真好勞惡逸行年逾六望七文移克棟汗牛而嘗於煇蒸栗烈之中勉與簿書爲晨夜卽偶有風雪燥濕之感亦耻以枕簟作生涯積漸而發驟難救藥病加小愈固其所也使臣向者四疏以後干冒天威再行補牘或未必至此而臣惕息君命勉強嘗試以致容邪乘虛變症叠出則臣命也雖然臣命在天不在醫自今以往更不在天在皇上矣皇上憐而放臣俾得以乘間調理少延視息是膏白骨而肉之也卽不然而生入里門令終牖下勿致以病廢瘵曠得

罪軍國貽羞中外則幸亦大矣蓋臣部非比他署可從容卧治者也辰下部務填委歲序更新提來歲之綱結今歲之緒全在殘臘一月臣卧病一日則百慮填胸卧病兼旬則彌年失計臣部雖見有侍郎二員而印在臣寓勢難代理雖有十三司司官而臣在病室何從稟成目今皇上宵旰於上百執淬勵於下而臣獨以衰病殘軀僵卧私寓廢朝叅而閣計務慚愧與惶懼交集其能一息晏然藥餌間邪用是不避煩聒再瀝血忱上請伏祈聖恩矜臣病已危篤萬目共矚立賜罷斥回籍其爲臣一身性命惜者猶小所以爲國計邊儲慮者實鉅矣奉旨疆事方殷軍需正急豈計臣自遂之日卿詳練



素著精力有餘着卽出恪職視事毋得頻請致稽部務

沉病難痊疏

奏爲沉病難痊曠職滋懼三懇天恩矜原放免以無誤  
邦計事夫人臣遭時遇主沐恩深重不能謹疾致身仰  
厯睿論之諄切卽石人亦且泣下四郊多壘宵旰未遑  
忝司會計而淹淹床第頻繁哀顛爲首丘牖下之謀卽  
木偶亦當赧顏况臣備嘗險阻積歲拮据一疾不振頓  
委前勞殘機未就敝筭可惜則亦不禁聲氣俱咽也聞  
命自天有不蹶然思起者豈臣誼豈人情哉無奈膏肓  
根錮方藥技窮困憊不支之狀臣前二疏已備陳矣大  
都面瘡作楚已難施其眉目所最苦者盜汗不已積成

瘵怯蓋至日閉藏冬汗原犯醫家之忌元氣消損盜汗  
尤非衰老所堪說者謂汗爲心液心血耗竭虛火上炎  
故得此症必非視息久存之兆迄今徹夜無眠興居失  
節穀氣受傷羸骨僅支向猶勉繕章奏命則神昏於視  
草矣向猶強治文書今則手顫於署紙矣每當病魔乍  
退之餘報主一念耿耿方寸始省身在床褥以來國計  
軍儲多所妨廢撫膺痛恨以爲殞於枕簟與殞於公署  
等也攬衣試起則榮魄支離作勢欲行而肢節潦倒病  
症至此卽興扶入署尙能衝寒辦事乎尙能與同官司  
屬籌盈縮商多寡而上下其議論乎不能而強以必能  
恐心計轉迷龍鍾莫繼無益於部務之毫釐而適以速



風燭之奄忽當亦聖明所俯憐也臣捧誦明旨一則曰疆事方殷一則曰詳練素著夫識途老馬閱歷粗諳乃垂首病鶴鳴食俱廢臣實無能爲矣皇上不念及疆事臣猶可苟延調攝念及疆事而壯夫馳騫不足者欲以衰病高枕圖之恐日耽月悞破綻侵尋乃始言去爲身爲國無一可者臣所以瀝血哀鳴望皇上決計蚤放者也臣病篤氣竭語無擇音伏惟聖明鑒臣情非假托勢難臥理垂帷蓋之仁以予骸骨遴清疆之選以佐安攘亟罷病臣讓賢者路則國計幸甚臣愚幸甚奉 旨屢旨諭卿已明何又踵請大臣宜遵君命豈容自便身圖着卽出視事不得再稽

目病不痊疏

奏爲目病不痊曠職滋甚仰懇垂憐旋免無悞國計事臣待臯計曹六年於茲乞休之章凡十數上病困則不容不呼天呼父母而稍愈則不職不陞見受事蓋生逢堯舜之君何忍自棄矢竭犬馬之力無敢憇然故未嘗作無痛之呻吟亦無嘗堅必去之志向勿欺之義臣盟之素矣無奈臣以踰六望七之年當此錢穀繁劇之任老至病侵數竒症怪真有日異而月不同者憶臣客冬痰火爲出恇忡盜汗已成疔瘵之形維時多方醫診或言宜先清理或言宜先補助清則効遲而後無害補則効速而發恐劇臣時累疏乞骸未荷俞旨氣息奄奄急



圖步履勉服補劑漸有起色適值聖壽元旦屆期只得追隨呼嵩之後然而久病乍起正如虛橐御風空革盛氣表雖外盈裏實中虧兩目熒熒漸艱睹視卽欲復申前請緣歲序方新元良有慶不敢遽以病聞延及二月初六日右目赤腫寒熱往來頭面相連作楚至初八日滋甚是日勉赴召對九列皆見而憐之然自初九日以至十一日臣猶力疾入署忍痛辦事已而視疲火炎兩目俱病癰澀難開痛如刀割淚如雨注內服涼劑外用洗藥絕不見效蓋至今日而醫之言驗臣之病始不可支矣十二日朝日大典亦悞陪祀今且竟日閉目偃卧私寓畏日羞明漸增翳障案牘紛至都付寢閣兼以虛火上蒸兩耳雷鳴蟬噪不辨人聲夫人臣之所恃以靖共職業者心志耳目也心志虛眩尙可借耳目以披閱聽受耳目不靈則俛俛贖贖舉止成謬言動受欺况錢穀詳細之地尤未可以冥冥決事者也臣部日行文移題覆章奏不可時刻稽悞臣旣耳目受病觸之不見呼之不聞自同官司屬以至胥役昭然共睹若再濫竽一日則悞臣部一日之事臣之罪不容誅矣伏祈皇上察臣目病非假憐臣顛懇情真亟賜俯允回籍調理速選賢能代理部務但得國計軍儲不至重誤則臣雖死之日猶生之年矣奉 旨邦計最重卿老成詳練方切倚任偶恙易痊着暫調卽出視事不必陳請



目青失明疏

奏爲目青漸至失明臣職無容久溺謹瀝血誠再懇速  
賜允放以無悞邦計重務事臣司計六載積譽萬狀比  
以積衰多病歲歲乞骸頻煩天語之溫罔補地曹之重  
茲者復以目疾陳情深懼瀆聒爲罪不圖聖恩高厚仍  
加勉留慚詳練之褒蹇足欲奮感易痊之望枯骨知春  
上未厭臣臣實戀主一息苟存寧忘報塞惟是數日以  
來集醫選藥攻補襍施無奈病根非一日之積藥餌鮮  
立効之功因憶客冬初患在面目生瘡及宣利之而遂  
得盜汗繼患在盜汗虛怯及升補之而今又得目青醫  
家止有此藥力日試一方補無功宣且有害矣臣身止

有此元氣日削一日不受補更不勝宣矣且臣受病之  
原固緣年力衰耗薄福致祟亦繇心血消枯積勞爲殃  
蓋臣以衰年肩劇任五六年間視漸昏而務竭其明累  
牘必竟心漸迷而務極其算瑣務必周自惟以勤補拙  
以勞救過不暇爲性命之憂而神太役則疲精過用則  
敝遂滋爲耳目之患昨臣初病目所患第在赤腫癢痛  
耳及瞪目視之字畫尙覺分明今腫痛少減翳障愈深  
雖極目審視而蒼素茫然雖執卷迴環而披閱莫解間  
令人讀之亦復不能了了兼不便於點竄旋罷去矣夫  
人之精神智慧盡萃於目目旣失明則亦土木枯骸芻  
狗具形而已聖明在上亦安所取於土木芻狗者而用



之矧戶部何地尚書何官九邊命脉所係非閉目坐了  
之事也十三司奉行所關非面壁相向之局也暫調既  
未能痊遷延必至廢事以錢穀緊要之職十旬九病挨  
排藥裹之間已無望於率作以纏綿宿痼之痾朝可暮  
劇反覆呼籲之煩其何當於靖共計惟有瀝血乞歸差  
不重誤國事耳倘皇上憐而放臣臣得一意調理偷視  
餘息敢忘浩蕩不然而欲去不得欲出不能食不獲下  
咽寢不獲交睫焦心溺職虛火益炎必將捐性命以殉  
之臣不足惜而邦計之積弛釀玩所損多矣臣病必難  
遽痊臣勢必不可留口占拜疏千難萬苦惟乞天恩卽  
賜罷免特寬帷葢之路速委左右侍郎署篆亟選賢能

大臣主計庶免屢瀆天聽而且以重誤國計爲也奉  
旨卿勤練素著邦計正借持籌昨諭旨已明何得以偶  
恙頻請着祇遵卽出視事勿再稽延

朦目萬難疏

奏爲朦目萬難主計誤身更以誤國謹灑泣三顙聖慈  
速賜允放事臣因目青甚苦計務坐壅再疏乞休荷溫  
綸之有加慚報稱之無地苟犬馬微力可竭卽雙眸併  
枯何憾然他病猶可勉強惟目病委難支持臣實錮疾  
非同偶恙不堪持籌是用頻請葢司計何地今日司計  
何時其不能以冥冥從事也明矣臣目旬日以來初患  
赤腫旣患翳障羞明惡風大類朦瞽伏案披牘如同面



墻間遇天日清明略有一隙之照瞪目讀之曾不及二三行輒復閉去或用藥湯淋洗既閉強開小有批註裁決一二緊要滯牘次日必且腫障加甚并一隙之照亦不可得矣見今公移科抄多付塵閣卽有原奉旨速覆者亦不能寓目矣臣每一思之通體戰慄汗出如雨掩面飲泣自恨不辰復叩之醫者云目者心血之精華心血虛耗則水衰火盛中於肺肝感於二目故心一動而目受之目中不容着一物心中不容著一事非謝事靜攝難望痊可臣聞其言益爽然自失五內如割嗟乎是天實絕臣以驅馳之路而臣亦自絕其獻靖之階者也夫景逼龍鍾不病亦當昏耗任膺繁劇不病亦恐茫昧

况一病潦倒已成瞽廢尚堪貿貿持籌濫竽司農之堂貽羞當世之士耶方今明明在上濟濟在下皇上事事勵精諸臣人人競奮臣忝筦握邦計統率司屬閉目相向成何景象卽濡滯一朝且不可况其久乎從此五官不靈百弊叢生必至僨事是臣留一日則尸素之罪卽深一日留臣一日則明作之功卽悞一日皇上自爲軍國計立允賜玦不待臣言煩聒者也如謂臣言或有矯飾遣人驗臣若目能視而以爲不能視力能料理部務而以爲不能料理者臣願甘受斧鑕之誅伏祈聖慈鑒臣憐臣真病真苦放臣還里俾得逭於悞國之咎卽瞑目首丘所甘心矣 留中



疏草一體篇帙最多當年皆刻之官署者喪亂之後  
原板悉不可問矣計有撫津疏草四卷督餉疏草五  
卷餉撫疏草七卷留憲疏草一卷留計疏草二卷度  
支奏議則有堂稿二十卷邊餉司十一卷新餉司三  
十六卷浙江司一卷江西司一卷福建司四卷湖廣  
司二卷山東司七卷山西司二卷河南司一卷陝西  
司四卷四川司五卷廣東司一卷廣西司四卷雲南  
司十七卷貴州司二卷今刻僅百疏不及十之一也  
且條議之疏率多列目敘述之處又從節文惟請告  
諸疏先少保公彙爲抽簪贅言者則備載焉朝廷  
眷注國計艱難經濟丹衷出處大節亦可觀大凡矣  
男際有識

卷七終

石隱園藏稿卷八

淄川 畢自嚴景曾著

書

上朱少司寇鑑塘

台臺雨露閔恩歎加蒲柳鞭笞至教偏重駑駘古之薦  
舉推引代不乏人亦曾有推心置腹獎掖愚蒙以偕大  
道如台臺者哉某受教以來夙夜兢兢無敢少墮污穢  
以負知己惟是賤軀羸疴不耐勞劇奔馳五載形在神  
疲真有日苦一日者矧吳地素饒風波猶未卜稅駕何  
所也不識台臺何以振之素仰清肅不敢以尋常縟儀  
奉溷闈人空緘佈候伏惟崇炤



與董玄宰

太史當是前身宰夫容城玉樓主者忽幻青蓮游碧落  
故一經吐吞便無塵世烟火氣味昔人謂屈宋衙官鍾  
王北面翩翩僊子如曼倩居金門供奉在詞苑無問識  
不識皆知先生爲天上人也奉使東旋鶴歸華表柰俗  
吏之疲奔致問奇之靡暇饑不能餐交棗渴不能飲瓊  
漿遭驪龍之睡而不能取其頷下珠恨亦晚矣不肖碌  
碌不耐致羸疾爲祟篝寒燈而擁敝貂索然旅况賤累  
遣歸幸乏牛衣對泣者屢屢弗啓長夜漫漫請丘壑之  
無從逃案牘之不得俗吏旦暮衰矣太史何以滌濯我  
耶仙旆還朝未得祖道此情蓋嚮所謂閒忙令也迄今  
悵惘計匪久且挾法眼以輸雋於左右輔或停帆峰泖  
間則獲拜下風倘可冀矣

與韓惺庵

里中晉謁過辱教愛戴德而南以春杪受事淮上屬運  
艘鱗集清口淺澁戮力畚鍤卒卒無須臾之暇以故久  
稽申候今少間矣遙憶台光真有落月屋梁之想敢端  
力敬問今玉體已善飯美寢乎鷹揚跋畧將無因邊報  
而思得一當乎憑虛藐然之間每月幾登臨浮白高咏  
之樂何人共來往此皆某所樂聞者媿某待臯波臣猛  
思可樹而甃夫舉步何有邯鄲恐終貽知己者之胡盧  
耳幸時有以教之振之



與沛縣張老師惺宇

今天下譚極衝疲之區必首曰淮徐而某以綿劣當之蓋耳熟災黎之顛連而慙無拯濟之策目擊黃流之泛溢而媿微隄防之能徒令人有傷心而扼腕已耳老師蘊匡時之畧握蒼水之符知必有訐謨碩畫可以起凋瘵而利經久者幸不吝披示民生若何河道若何俾奉以周旋無或失墜則教門墻卽所以惠桑梓也

與沈柳庵

客秋弟待臯冬官稔聞沈先生絕代異才也蓋一日而名噪長安矣旣抵孟城得南宮聯魁報謂必鼎借庶常用儲公輔已得除目暨晤何山年兄知以萊彩關情已

俯就選人矣惟是選而同舍又政得兩廠也珠玉輝煌飾我頑鈍弟實有厚幸焉兩廠事務甚簡况以台丈弄丸遊刃之才試之會不當一瞬獨是匠役之貧業已徹骨而諸無名之費如繭絲如牛毛諸貂璫之橫又不可以理解戎器不精則溺職而難乎其爲上戎器欲精則束濕而難乎其爲下也某待臯三載極費調停幸賴台丈璠璣之飾計且煥然改觀而茲又鼎借採運矣奈何台旌蒞泃口某忝爲地主擬負弩以迎而未遑蒞駐節京口嗣當更有請也

上撫學河三院

職以樗櫟散才荷蒙作養備員監司抵任未幾豈敢遽



萌去志有辜任使第職一段苦情誠有萬不獲已者職不敢自爲張皇病狀以干欺罔但以至真至迫者列之公移循例上請惟台臺憐而許之及今而歸固已晚矣若戀戀升斗不亟自引退是名教中罪人也台臺亦何取於得罪名教之人而使之居表臬之位乎且方寸已亂自難供職萬冀台臺早賜代題真母子沒齒之感也

答朱海曙

長安判袂倏踰六載時與淄費童叟共頌甘棠之澤乃以碌碌牛馬聞問闕如也丁未待臯淮揚盈盈一水方擬虔候起居旋遭先慈之變慨五斗之羈縻未遑將母悵屢辭以齟齬竟負終天傷哉情也歸來恨積千峰血枯寸草忍死拮据勉襄大事雖存視息而形神已銷亡矣臺下不遠數千里檄書慰唁光賁松楸銜佩明德直與罔極俱長謹南向稽首申謝別具誌帛引意臺下宏才碩望海寓引領自當爲國亟出以副太翁期許之心以慰東人袞衣之念豈得高臥峰泖間哉

答賈元一

某頃歲伏居草土交游聞問一切報罷以是久疎申候於左右客冬翰教臨存此時計事已迫台車遄發亦竟不獲一圖報塞感之媿之春來荏苒倏屆服除言念罔極怍怍於中又突有嗣子之變西河之慟真不聊生何能復問人間事且也卜居山僻除目未睹卽老父母繁



借大邦樹駿流鴻從茲托始而某褻如充耳闕焉稱賀  
殊可笑也載荷不遺瑤函珍錫有隕自天其何德之敢  
承竊計老父母才品政事實爲天下第一流故所治當  
亦稱是蕞爾小邑何足羈大賢之鳧鳥邪矧計典甫竣  
而隨有此舉則臺下峻望已在冰鏡蘭省之間烏臺秉  
憲不足言矣某曩竊祿淮海罪狀實夥邇者幸不顯斥  
復叨異典洵所稱不虞之譽抑亦臺下二三君子嗜昌  
獸而游揚之也第愁苦之餘衰病侵尋長林豐草若將  
終焉上與夔龍無分下與麋鹿有緣從此雲泥頓隔晤  
對無期奈何

與張憲松

門下需次燕邸倏忽二載高選烏臺卓冠群倫而弟漫  
無一函爲候爲賀則嵇懶成癖矣弟年來草土餘生百  
念灰冷是以服闋已久業堅意不赴部而無端復有晉  
中之補欲抗疏乞骸骨而又恐以我爲矯也顧百務紛  
糾室人多病無奈簡書之迫何敢望門下鼎力以維持  
之務以臘盡爲期則善矣

與韓城薛世兄

不佞以一介寒儒昔辱老師識之塵埃寵之莩李耳提  
面命夙夜匪懈又荷令兄念翁折節下交情深膠漆金  
石可銷此誼難泯矣不佞濫竽仕路叨縻升斗飲水知  
源敢忘所自惟是棲遲冷曹兩際大難魚雁旣稀聞問



久濶卽老師仙遊竟不獲炙雞絮酒少展西州之慟罪  
歎胡可言客歲承乏晉陽除日得令兄手教繾綣過情  
且約以暮春之後把袂論心竊喜數十年積抱傾瀉一  
旦方計日以須而門下報計之章至矣捧讀之餘寬搖  
腸裂嗟乎以老師之盛德而不昌厥後以令兄之雅誼  
而不長其年且人生良晤乃有定數如此可訝也亦可  
悼也及詢盛使知靈輿已南下無從拜奠椒漿良用耿  
歉薄具寥寥幸爲治具叱薦靈几前幸甚門下遠抱宏  
才老師箕裘之紹於焉是賴憶在署中頭角崢嶸業自  
不凡知己脫穎芹泮良用喜慰頃接翰教情意殷渥交  
采陸離指日鵬搏鸚薦以光先烈知不遠矣惟節陟岡  
之慟珍玉下帷用期遠到所至望也

答王霽宇

上人妙峰精通法乘廣布慈航惟是汾河之橋數百年  
來寒心咋舌而不敢議今上人慨然任之總而期之於  
有恒此等定見定力雖儒者猶或難焉每一晤對不覺  
令人欲心平而躁心釋矣緣先後兩撫臺咸欲借重上  
人福緣爲地方永賴計是上人無求於世而世不能無  
求於上人也諸所護持寧顧問哉伏承鼎命敬鏤心膂

與許繩齋

伯兄今寓內第一流也德業追曾閔政事埒龔黃文章  
繼班馬墨妙婉羨獻弟何人斯敢望下風祇緣宦轍所



蒞先後雲間彼中雖饒風波而人情輿論差不異汝南  
月旦第心旌搖搖時切嚮往而伯兄亦若有嗜痂之累  
者所從來矣茲幸聯事三晉咫尺台光昨拜翰教送抱  
推襟借之臭味益不任沾沾色喜語云因不失其親亦  
可宗也第今得所宗哉佇賜指南慰我饑渴第嚮艱嗣  
續庚戌纔舉一子客秋賫捧東歸乃復失之隻身子立  
沉淪苦海旦莫擬拂衣歸去伯兄蘭玉盈階勝第萬倍  
乃亦悼亡特甚雖云情之所鍾政在我輩然試以第較  
不更當霍然乎

與張華東

恭聞榮命新下領袖掖垣深切怵躍竊惟邇年來天下  
大事俱壞於紛紜翕訛之口今不惟聖明厭之舉世亦  
交厭之矣老年丈智深而勇沉諸所建白必有片言居  
要者而國家和平之福亦可賴以培養也

與韓鼎宇

弟前歲初抵晉陽孟白李君爲憲長肝膽期許一見莫  
逆弟竊窺其執法也嶷然如山而接物也溫然如玉蓋  
表裏洞達才品並茂者真大受器也茲擢江藩時奉台  
丈功令之下賢豪臭味計必默相契合而弟以膠漆之  
夙茲敢冒昧一言計藩臬中所可托重而恃力者如此  
君輩恐不多屈指也晉中直指爲雲浦蘇公弟實謬辱  
知愛傾心相與顧弟則何敢望孟白萬一哉



答李孟白

台臺介不絕俗和不刻正真品真才寓內寡儔不佞弟  
微天之幸依光晉陽昕夕握手言言肝鬲方冀長侍台  
衡永依型莖不謂台臺有江藩之轉而不佞弟亦輒有  
齋捧之役睽隔清徽邈焉河漢矣台臺清軌茂樹流播  
三晉者種種在人士口碑而按君尤以不得同時爲恨  
辰下大計伊邇吹求頗急至如台臺精金美玉更無間  
言又何煩縈去後之抱也弟碌碌晉陽媿無寸樹頃復  
仗芘量移河東舊例駐劄蒲坂聞其地俗輕而口多似  
與弟直腸拙性不甚相宜未知稅駕何所且豚兒自客  
歲歸里卽以宿疾夭折肝腸欲裂呼天無從屢承慈注  
遠寄藥物愈揮西河之淚耳血胤寥寥愁緒滿腔會且  
謀引去投老於長白峰前矣

上蘇直指雲浦

大閱事宐職據膚見條陳十款深媿樸樾無次抑恐窒  
礙難行惟台臺揮而擲之別出石畫以光鉅典可也又  
思晉中弊政如通省之皇稅繁峙之皇租河東之餘鹽  
均爲民害亟當釐革統俟台臺及瓜報代并入一疏爲  
三晉生靈請命也

又

莊誦二記一歌摹寫龍門汾陰之勝炫奇耀景盡態極  
色真文中畫也且能發揮性靈住世超世儻然烟霞之



外卽蘇長公之赤壁杜少陵之漢陂不是過矣職惟魯不文無能仰贊下風反藉鴻華以留姓字於江山之間割榮當何量邪

### 答撫院

河灘一事伏蒙憲劄諭以在晉者歸晉在秦者歸秦此公平正大之體也盛明之世旣無分土分民豈宜偏肥偏瘠在彼方無地而賠糧在此且因灘而起租揆之情理委爲不妥惟是經界久湮驟難清楚人情嗜利狙爲故常似有未易言者粵自黃流西徙凡種田者各照其田之所嚮而占種之號曰門面灘地此顛實繁而強有力者又復乘機吞併所從來久矣州官因而徵之歲得

租穀千石以四百入學倉賑貧生以六百收常平倉備賑貧宗貧民卽該州書手工食亦取給焉歲終具收放數報院以爲常今若一切掃滌歸之朝邑干係通國人情勢將洶洶不已甚且爭地以戰卽朝邑亦不能安其耕耨之常矣此外自西門以南爲南灘內山陰府占種一百三十餘頃冒稱欽賜已經襄垣訐奏查勘未結前歲殺一內官該州移文朝邑會勘竟莫得其主名卽此地也自西門以北爲北灘逼近大慶關真朝邑故地聞昔年有朝邑令爲韓象雲太史門生者以此灘地送之後此令敗掛入彈章今竟爲不拔之業矣近雖申請憲檄委官清丈而此二項尙未就約束一駕言於侯旨一



藉口於秦疆所謂河南南陽不可問者也又查王襄毅學田碑云蒲在晉西境臨大河夾河民田歲多浸沒故國初開除河灘原未起科俾民佃種藉補歲額若此似蒲州原有灘地矣又聞蒲州東南下流爲譚郭陽賢二里乃河流轉灣處損失納糧地二三十頃見在賠糧是蒲州亦有失地矣議論之不齊如此且黃流昔在蒲坂城下蒲之薦紳尊顯者衆自河流西徙後則秦盛而蒲衰矣蒲坂之人亦日夜望河之復來也至於目前灘地占種已久不啻集羶之蟻誰肯輕割必仗台臺威靈加以題請事或有濟不者恐發大難之端耳大都朝邑隔河種地終是不便而蒲坂之人又藉口於秦晉以河爲界之說然則爲朝邑者急於清丈豁其賠糧亦未必非善處之策矣

答蒲州鄉紳公書

伏承台諭仰見諸老精白事神爲民祈福之意某不敏叨有地方之責敢不祗承以賈大戾惟是五邑伶人議停二十年矣何其宐復而久不復也其故可思也夫神聰明正直而一者也豈其不以百姓疾苦爲念而務求淫樂以逞其欲必不然矣成案具在似難紛更公移已發似難食言無已則仍行蒲州多其脩享豐其牲醴可乎若其儀文不備獲譴於神某當與司牧者均任之不以爲士民累也



與蘇雲浦

洞庭湘江之奇甲天下台臺錦旋數月以一人饒領之  
致可樂也當今時局紛紜涇渭莫辨台臺以整頓乾坤  
之手反高臥烟霞可謂寓內長太息者此矣一切放遊  
之適著述之富可批示一二以蕩滌俗吏之塵襟乎職  
以寄蹇之遭兼膏肓之病久欲乞骸歸里屬以巡道乏  
人驟難解縛尙在逡巡未果忽有遼左之推非其據也  
不能者止分義則然豈敢別萌他念不意部推於十一  
月初七日至本月十五日職始見報而新按臺保留之  
疏卽於此月之十二日上矣維時職居蒲坂新按君居  
太谷絕未一而且相距千里卽片紙未及也總台臺噓

植有素兼偶承地方人乏是以誤蒙特達之知備極獎  
詡之辭真所謂不虞之譽邇者薊遼撫按猶有疏揭爭  
執以跡而論職似有規避之嫌者嗟呼此造物者所以  
成職以爲掛冠長往之地者也稍俟新巡道命下卽當  
決計漁樵矣

與顧寰清

永寧州守張黎津吾儕同舉戊子者也第猶記放榜後  
諸同年俱乞冠帶以榮所生而此兄獨以椿庭蚤歿例  
不得預在廣衆中嗚咽歔歔踰時不已第用是深服此  
兄之純孝也一別二十載聞問濶如嚮慕如新嗣見擢  
淮陽之守計造物陰庇孝子必浸假大用爲吾儕鄉榜



兄弟巨擘矣乃又左遷永寧豈非以資格限人哉幸屬老年丈宇下塞翁失馬倚伏相乘政此兄所爲終食孝子之報者也偶聞莅任永寧因漫述往事請教老年丈譜誼甚隆必加青盼萬冀以其全力自爲噓植而又以其緒餘代弟敦篤卽弟拜賜不淺鮮矣

答李直指燦巖

台臺持斧三晉凡冀并生靈無一不沾汪濊至河東一隅似覺沐德更深被澤尤渥如斥供張也減詞訟也罷訪察也發倉粟也釋冤獄也飭從役也清滯案也除奸胥也種種不可枚舉而總之以清心寡欲澹泊寧靜爲主三晉士民何修而覲此福曜也昔子輿氏教人以無

爲不爲無欲不欲惟台臺能充拓得盡陸象先稱天下本無事庸人擾之耳惟台臺能滌除此弊寓內巡方使者而皆如台臺也天下可立致昇平矣乃台教又云悔不做得好事則必如何而後爲好事如何而後無悔吝也哉望道未見於茲信矣職不肖竊計終身型範於焉在是媿私淑之餘無能步趨萬一也台臺會審駁問囚犯簡而且精案到卽行該府鞫訊恨不旦莫竣事但舊例必道行府府行州縣鞫問之後州縣轉府府又轉道中間勾攝轉解有不妥處仍須駁問勢不得不少需時日然不敢不亟爲督催以仰副台臺好生之德意也



職頃因病乞休荷蒙台臺褒以華袞勗以騰驥撫躬內  
省感悚交集語云士爲知己者死職何愛此七尺而不  
龜勉報稱爲也顧職邇來沉痾已極自午月朔以迄於  
今僵臥燕室計四十有五日矣一切緊要公移間亦忍  
死了於床褥然而每苦昏眩兼且時思謬迷至鹽池結  
花相距僅百餘里例當親臨督採而困頓不能也尸素  
若此將安用之夫台臺之留職爲地方也職既病憊無  
禪地方而反以滋叢脞之虞則不如奉身而退猶不至  
重傷台臺知人之明也儻辱慨賜放還不至隕越客邸  
真起死人而肉白骨矣銜結寧有窮哉

答李燦巖

職頃病困屢牘乞休掛冠東行長負噓植自分罪無可  
贖悚息以待行至黎城境上言念台臺知遇深重若卽  
恣然長往匪直功令森嚴此心殊未卽安用是棲遲旬  
日以俟允示嗣接憲劄不加督罪翻叨獎詡戀別真懇  
溢於言表捧讀未終不覺感極泣下謹北望臺端敬謝  
明德因念台臺之留職爲地方也彼時原無半面之識  
亦無介紹之容天地在上鬼神可質而說者有肥瘠之  
語關職名節點職生平姑無論矣乃揭末又云所以爲  
人情則善矣是台臺以曲徇而留職亦以請托而得抑  
何苛求之甚也海內耳食者多安知異日不爲話柄自  
職一去則不惟職之心跡白而台臺之心跡亦白矣雖



不能造福地方或庶幾無媿高明想亦台臺所洞照也  
惟是功名可棄知己難忘樗散如職宦况素澹從茲養  
痾藏拙便可漱流枕石以畢此生台臺間代人豪目空  
海內乃獨於職不勝昌歎之嗜盡脫形骸披瀝肝鬲釋  
堂簾之分而敦骨肉之懽如此天地高厚之恩真非捐  
糜頂踵可報異時台臺畫錦天中職未卽填溝壑尚當  
徒步千里伏謁台墀然後罄此區區也

答高東溟

翟凌老在枌榆中真弟所稱莫逆交也曩歲弟有遼左  
之推未幾而三院會疏題留矣查推疏在四十一年十  
一月初七日而李按臺留疏卽發於此月十二日時按

臺初入境駐劄太谷弟居蒲坂相距千里素未一面且  
蒲坂距京師可二千里題留之時弟尚未得推陞報也  
已而薊遼薛總督有疏仍欲弟入遼凌老有揭亦仍欲  
弟入遼言之尤力不謂部覆之仍留也此時弟之心迹  
幾於不白卽凌老夙辱知愛必能諒其無他而規避營  
求之疑其能家置一喙乎弟病困之夫久欲歸田緣此  
遂決計掛冠其實凌老揭中推轂之語特多不可謂不  
知我其欲弟入遼甚急不可謂不愛我弟方感恩戴德  
之不暇而敢毫有怨尤芥蒂於其間乎特弟所處之時  
勢有不容不引避自白者耳賤體善病日事藥裹一丘  
一壑實獲我所凌老海內名賢正賴匡扶世道茲欲十



載閒居相謝是雅相契厚者而更啟猜嫌存形跡也第未敢聞命希爲轉致區區

答李副將

羶藏之事知麾下留心處分久矣無論增中馬匹難以輕許卽賞賚諸物不得其心服而輕擲之無益也至於跌死馬匹亦混賴中國賠償尤爲桀傲無禮總戎來催速賞蓋未悉其情形耳麾下不輕言動兵亦不輕與賞賚但欲俟其入境搶掠之時乘機大創真是勝著妙算願加意圖之使其畏威悔過而後撫賞未晚也

答階州

辱貺種種均屬塞上所乏極佩至愛第先是有以土物時果見惠者概未敢拜蓋緣道屬地方遼遠一時受之未足傷廉而異日沿之遂爲定例究將以一口食之微而令僕僕道塗勞頓物力誰之咎也卽欲黽勉登嘉以副盛雅豈容開異同於同舟之間乎敬以心承

與胡充寰

鉅鹿與灤海俱處畿輔之內山川不甚遼迥某曾不能時奉尺牘奉請方畧祇以戎幄新開百冗鱗集隻身支吾日亦不給非敢有遐心也每捧大疏翩翩籌策何計之審而辭之工乎至如遼西屯田目前足阻長驅日後可垂永利卽趙營平之計先零羊征南之鎮襄陽奚以異焉又見題造戰車精心妙製遠軼古式特於靜海取



一輛諦觀之施機巧捷堅緻異常一時造車者無慮數十家胥拜下風矣其不揣竊有請焉台臺以六郡之全力揆屬邑之饒薄分曹列等計日程功體郵旣周成造亦夥其欲按式自造則士多袒裼兼苦露處於勢恐未暇及若欲督責郡邑則所隸止河間一府已造之後於力似難更支然遂舍而不製又何成營壘而壯士氣終夕躊躇念大君子謀國之忠無分疆域而以大字小古今通義且以情告量無矛盾愚意台臺用其五郡邑者而津借用河間一郡邑所造其用過工價令該府卽於做鎮項下開銷儻蒙俞允仰荷台臺同舟之誼郵隣之仁得拱手而受成事卽九鼎駟馬不足喻其隆渥矣敬延頸以俟鵲巢鳩居惶媿何如

與熊芝崗

讀致遼左撫按二書備悉台臺謀國精忠籌邊遠慮君子愛人以德真是今古合轍矣夫美疢不如藥石從古識之向來遼撫或失於輕信或踈於調度特苦不自知耳非敢爲異爲抗也得茲良規必且曠若發蒙恍然憬悟庶幾改絃易轍共濟時艱進戰退守不失昔年台臺嘉與拂拭之盛心哉計台度汪洋終當在涵容中也

又

每捧大疏服膺三復極仰台臺深沉之識雄遠之謀老成圖事揆策非嘗試漫爲者比某雖未嘗躬至遼西然



觀今之物力將卒俱似不堪大舉者夫天下事言易而行難勿易其所易而畏其所難迺庶幾矣戰守原非二義先爲可守則進退皆得裕如且也隆冬出師兵法所忌古人惟有淮蔡之功其餘亦不數數見也恭聞台臺出關以來戎服輕騎行冰雪中無險不親歷無將不撫循真足萃渙散之人心肅凜情之軍氣讀聞見述益信台臺苦心勞畫不必決機兩陳之間而一切任事任人自足奠安華夏矣目今逼隣虎穴寄身危堡上爲冲聖宸旒所倚重下爲百萬軍民所頌戴卽九廟神靈亦當鑒照之冠紳而下計無不傾心相信者譬之寶鑑愈琢磨則愈光瑩矣非敢爲謾也

又

忽聞河西之警令人痛憤無極議論紛紜競喜言戰而戰之不易一至於此迺知台臺老成持重真有卓識定見益可以諒不和之故矣目今兵氣日餒民心日離蒿目時事尤爲可駭可懼瓦解土崩之象似在旦夕所恃惟山海一關若能以丸泥固封猶庶幾金甌之無缺至若沿邊諸口在在堪虞曲突徙薪圖維宐蚤所冀台臺益殫忠貞仔肩鼎呂凡有益於邊陲無少播於浮議終當奮翼澠池收功桑榆也宗社生靈實式憑之匪佞匪佞憂心如焚謀國無策拮据徒苦顛蹶可期惟是一念自矢與台臺久要之誼誓當永永勿替耳



又

昨拜手教之辱計旦暮抵津門可圖一良晤廼明旨准令回籍而台臺入京請逮卒以物議紛紜不免對簿台臺此舉恭謹勞謙可謂得人臣禮矣敬服敬服計朝端公論自定風霾有開霽之期雷霆無竟日之怒也

與張大司馬翼明

津門新募水兵創立三營昨有小疏欲設將領統練會同總督具題業奉旨下部矣頃准部咨各舉本弁舊日彈文以相詰難又以三科武舉例不推陞守備爲言仰見鄭重名器慎選將材之意惟是各弁招募訓練効有成勞政欲鼓舞激勸以爲乘風破浪地卽有夙青小過

仰冀破格原免若先事而羅之迨成事而棄之食前言而灰後志似未見其可也某以不才承乏節鉞當茲封疆多事必借朝家爵祿樞筦玉成方可奔走豪傑展布四體不則殆矣况初設水將視舊營伍各官何啻霄壤名雖推補與加虛銜者同計亦不必恡吝者也萬一此兵不募則此缺且成烏有而何煩爭執又或久署不題則此官固自受事而何煩推缺想台臺必有洞照矣至於道路悠悠之口似有吏胥索賄不遂之議竊計台臺鑑衡精明此輩安所容其伎倆決難輕信者也

與孫樞輔愷陽

仰惟台臺闕關之行安攘大計恢復訐謨在此一舉蓋



自昔趙營平知兵猶以百聞不如一見兵難踰度願至金城圖上方畧已果倚辦成功爲漢史美譚矧今一線榆關百務繽紛其至要者如欵部賞費之宐豫版築竣事之宐速幸藉旌纛陟降巖塞一切借箸聚米邁伊呂而軼方名區區長平驃騎可勿論也目前閩兵援鮮行止最屬喫緊而前招之赴津今又俾之離津於津尤屬喫緊政以閩兵客歲奉檄自閩止約戍津不言赴鮮執以爲辭堅不肯東發耳無奈毛弁海外勢苦單虛經臺師中義勤接濟某係同室披纓救鬪於情於勢俱萬不容稍緩頃方爲之竭蹶遣發而忽又從邸報見林丘垣疏有四不便之議其言亦大娓娓有說某竊不勝杞憂卽或旦晚強之使發恐發而中道衝命或風波叵測未盡抵鮮抵鮮而不能成功以歸異日將執爲發兵者罪案某其何辭乎媿某智短見淺不堪汲深所恃台臺平章在握可藉稟成竊計寢而不行將使鯨吻孤軍孑立無恃固不可也若強以必行又恐魚腹堪憂星散可虞萬一空費帑餉尤不可也就兩端而求一是惟政地有石畫不靳提命庶幾咄嗟于襄爲幸耳

答鄒南臯

某頃受事版部緣新中丞節鉞未至尚復代庖戎旃一切束支西吾真是皸皸血指矣幸李懋老旦晚蒞任庶幾藉手弛擔以日爲歲忽接鼎札過期以頗牧之任非



某所敢聞也其或台臺愛忘其醜襲石以錦自是式鞋  
招駿一腔苦心第其實非軍旅之才今茲仰仗台植藏  
拙計曹已大踰涯分矣又况蒲柳早衰方且思賦遂初  
何容再有塵忝儻有噓及與惟台臺爲某婉轉止之感  
恩知己鏤篆匪淺也東省會勦已發兵五千矣尚賴群  
力夾攻庶可望撲滅耳

與汪大司農澄源

東土妖賊初時撲滅亦易不謂偶爾忽視遂致蔓延難  
圖近日四將偵轅一敗塗地藩府告急濟兗危困腹心  
之禍誠有大可寒心者矣治某素切桑梓之憂兼懷漕  
渠之慮况承台臺激切顛天業奉俞旨敢不竭蹙發兵  
共圖殄滅茲謹遴發五千統以三將監以憲臣庶幾可  
稱一隊之師儻群力大集互爲犄角於以迅掃妖氛無  
難也兵餉急需萬惟留神解給見今一面搜括督發矣

答來監軍馬湖

偶聞景州之變令人驚駭寇在門庭亟須剪除擬暫借  
東征之師而又恐前旌之遠也捧讀公移知己移兵勦  
除可任快心賊寡我衆撲滅無難但須計出萬全毋以  
小寇而易之所至望耳

又

門下自景入兗晝夜疾驅政恐鞍馬勞頓得教知己清  
健倍常親冒矢石以爲士卒先可爲愉快妖賊雖小醜



乎而在苒蔓延已五閱月其中豈無智勇之士似亦未  
可輕也目今或合圍鄒城以待食盡自斃或先取滕縣  
而令孤立援絕是皆策之善者門下滿腹韜鈴趙公祖  
必加托重同心圖維出奇制勝其於滅賊易易耳大捷  
班師敬拭目望之

與汪澄源

昨承台翰以朝鮮運事爲問大都萬里風濤飛芻輓粟  
原是最艱至險之前七月間在霑化縣失風一次至  
八月間在劉公島又失風一次嗣是音耗不通外論喧  
傳謂黃叅將孟推官俱無下落糧艘僅到一半令人驚  
愕不知所措今幸有人言旋始知糧艘損壞不多而毛  
總戎實收運到糧料共計九萬二千餘石布疋軍火器  
械亦到十之七八真徼有天幸矣登州尚有糧艘十二  
桅舵雖壞而米布俱存仍可修艙以待明春發行赴鮮  
也茲具實收公移報部仍俟查明另行具題大都各官  
萬死一生此行良苦仰仗台臺主持破格優敘以示鼓  
舞庶幾鮮運猶可爲也

復余健吾

延綏兵馬昔年精強甲於寓內今非其質矣糧餉匱於  
京運將帥習於剝削營伍困於占役精銳耗於東征難  
言哉若非改弦易轍延事未可爲也所幸天錫年臺徹  
底振刷頃所條議興革靡不洞中膏肓從此梨庭掃穴



浪破長風鑄鼎銘鐘功收指日端可跼足俟矣弟昔年  
待臯延西雖曾奏助撫賞所媿涓滴之潤霑濡未弘何  
煩年臺惓惓獎詡耶惟是明暗私增大爲邊累而不肖  
守操官又復夤緣攫取其間莫可究詰安得設處正項  
刊定成額以永杜此害也至於安定二城弟庚申歲各  
築磚墻一面尙存未修一面不知比年已訖工否若漸  
次包砌磚井寧塞是亦百世利也石澇三山等堡原是  
沿邊二路邊塞人烟稀少藉此可以招集先年條陳裁  
革棄險不守止戍一線危疆似亦非算之得者若故址  
可仍則修復爲便耳

答毛總戎

遼左淪胥幸賴海外牽制之師得成榆關丸泥之勢則  
麾下之功在宗社者至弘鉅矣初時中外紛沓意見參  
差疑信各半今則事久論定輿情歸嚮萬口一詞聖明  
東顧倚重不啻萬里長城陟元戎更假便宜晉府銜復  
賜上方一時綸綍輝煌恩光曷奕大丈夫得時而駕真  
與班定遠異代齊驅若果天心厭亂奸虜內作三韓恢  
復四海磐石於以流光竹帛垂休天壤真寰宇一大快  
心事也不佞職在轉輸憂深國卹每思源源接濟敬助  
一臂之力屢經題請乃副鄙懷惟是津門抵鮮海面三  
千里而遙危險異常客歲秋深尤苦風颶嗣得賫到實  
收如獲拱壁及從邸報莊誦大疏薦揚押運各官艱難



顛沛總荷炤譽頓令人情踴躍樂以忘勞而不佞亦得藉以逭於戾其感侈矣今歲運事鑒於客歲之遲擬以四月開洋五月抵鮮必不使麾下有用量沙之困壯士起呼庚之嗟也忽拜翰教之辱極佩注存孟司李忠義過人今在麾下幕中知必同心共濟無疑矣管大藩前以糧乏而歸今復入鮮供驅策於左右所冀嘉與更新終始提携亦屋烏之極愛也

與孫愷陽

春已向莫榆關晏如北門鎖鑰今又一萊公矣竊在下風愉快何如山東營都司劉永昌部兵二千驍健絕倫津門銳師此爲第一永昌又復視躬廉介飭伍森肅如此將畧真某從來目中所僅見者粵自統兵抵津某卽加意激勸後遣東省平妖轉戰數十合連下鄒滕二城本官功績莫之與京而當事題敘猶未免以主客相後先迺公論則固有不可泯者矣茲以赴關更番備驅策於轅門頃津撫李懋老代爲疏請加銜言言實錄儻蒙台臺賜之青眼假之便宜令其感恩圖報乘時自樹必有可以獨當一面者憶某客冬在關業於語次推轂本官今其行也似不容無一言要以台臺知人善任錙銖不爽固無俟某贅也

與趙儕鶴

頃者內計大典幸賴台臺一代正人主持於上公明並



運黜陟咸服至考察勘問議尤是膾炙人口所禪聖朝  
式序之化良非淺鮮某轉餉無功積讐不少自分擯斥  
尚辱包荒豈非仰荷雲天之芘遂獲瓦全爾爾哉知感  
知戴頃者餉院一差吏垣以爲當裁不肖以爲當仍非  
敢故爲異同政以錢糧重大必借直指耳目以明心跡  
加派殷繁必借直指查叅以資接濟總爲軍興起見卽  
有以惡聲相加遺者亦任之矣台臺不棄蒞蕘獨持衡  
鑑特請照舊題差於以資料繩而重封疆斯真大臣純  
忠體國之極思非但某席床追戾而已一切知己之感  
國士之遇惟有永鏤肝鬲耳

又

老先生道德濬源洙泗文章接踵歐蘇雖在神廟極治  
之時獨抱直諒不阿之節一時激濁揚清難進易退海  
內人士無論識與不識莫不側聞風采想見光儀雖爲  
之執鞭所欣羨焉會聖天子出震繼離搜揚耆宿拔之  
巖穴之中登之總憲之任一時朝端密勿虛已以聽指  
撝台臺毅然以紀綱法度爲已任讀諸封事頒布規條  
令諸柱後惠文不寒而栗子遺黔首不雨而濡迺聖明  
亦復臨軒擊節歡同魚水于是曩時冒濫之習苞苴之  
風吏治民生灑然爲之一變矣屬者冢卿虛席九夏引  
領無不以爲衡鑑重任舍公誰屬而今果符所料益信  
人情賢於夢卜也從茲表帥六卿羽儀八座分涇渭於



九流別蕭蘭於千里匪但正人進而邪人退將使大臣  
法而小臣廉會見仕途之日以澄清海寓之日以昇平  
宗社之日以寧謐矣豈非世道之幸國是之福哉某不  
肖自惟行能謏劣無所比數惟是屢辱誨言曲垂陶鑄  
竊用銘鏤于中邸報初傳倍切彈冠之慶謹馳尺素以  
將寸忱伏惟爲道自重爲社稷蒼生自愛不宣

與孟推官

門下遠涉異域載離寒暑茲行良苦入春以來日望歸  
航而海上之音杳然令人悵悵因憶去冬運艘言旋接  
有門下手書恐以一介行李爲屬國累具覘廉靜之操  
不佞當卽據以入告卽毛總戎亦有疏矣近聞門下復  
有王京之行久羈中途豈出使須復命勅諭無回音有  
不便遽爲返棹者乎日今鮮國廢立回視客歲又另一  
機局矣門下留滯逆旅恐無了期若能熟察順逆之形  
細酌輔車之勢或有一得可佐廟算鵠首西馳不辱君  
命不亦可乎惟門下良圖焉

與鄒靜長

忝附世講久企斗山西春都門懷刺往來竟未獲一覲  
紫芝眉宇悵歎胡可言近聞年丈已出守長安襜帷所  
蒞霜湛露濡將使扶風馮翊之間依稀復見西漢神爵  
五鳳間景色矣韓城故廉憲質亭薛公規言矩行葆素  
完真覃精理學遠追濂洛宦轍所至咸有庾桑畏壘之



祝歿而李翼軒先生爲之傳言言實錄先是丙戌丁亥間任做省濟南守道第甫角兆卽受知遇延入署中與嗣君下帷昕夕闡發奧義聞所未聞遂得濫竽一第受恩最渥覲德最切近聞其邑士民公舉鄉賢殊爲忭躍竊謂惟公而後不媿鄉賢亦惟鄉賢得公而後增重年丈篤於緇衣必且玉成無疑廼門墻下士豈容默默者薛故宦族近緣豕嗣不祿其次公及豕孫俱困青衿不勝廢興存歿之感冒昧唐突諸惟鑒照而翼芘之

答張蓬玄

兵與餉重務也歸併兵與餉苦差也某以疎拙之才兼衰病之軀惴惴乎覆餗負乘之懼安得不辭嗣見台臺

大疏似覺議論未歸一人望未繫屬又安得不揣分引嫌以辭况屯寺賢者也比以事權不重統轄不廣輿情咸有加秩卽真之望而大疏適相值也又安得不推賢讓能以辭第某與台臺夙附維桑兼承臭味亦稔知台臺之必不以薄爲道也顧當廟議未定之時旁觀者無不爲某訝而某亦不覺自訝種種前情總屬肺肝所敢飾詞以相欺者有如津水捧讀大揭并拜台函所稱出入均勞曳履星辰等語推轂踰涯某不敢當又謂東人落落憑人位置此皆某意中事某不敢以告人者是知台臺愛我卽骨肉不啻矣敬用鏤刻永矢弗諼辭疏發於長至越數日而津道來見云奉到尊劄有一撫再撫



語甚相憐念殊自懊恨所謂駟不及舌者也惟台臺憐而宥之

與李懋明

津亭握別忽逼歲殘過隙居諸又獻春矣雖邈哉山川晤對無繇然金石之音鸞鵠之姿固隆隆耳根隱隱夢中也江之永矣不可方思風人之言若爲今日設乎竊窺台臺才品卓犖識力沉雄可以橫絕一世如某寡陋自顧形穢回首循省不識何當於台臺而披肝膽傾意氣若斯之深也秉鉞津門遙相爲政同舟之雅有逾骨肉卽今幸免顛蹶量移跬步總明德之所波及者受事以來披讀故牘尋問舊章無往而非師資之益庶幾是

遵是循以少逭罪戾於萬一無奈羽檄飛馳徵發倥傯標正毛兵河南四營一時俱調喜峰口防禦自嘉平望後督發毛正河南三營業已成行俱於年前抵邊惟標兵營尚以無將無餉少爲遲廻又緣重鎮空虛具疏祈免見候部覆至於運脚全虛豆價不敷一番疾呼一番側目舉足搔手動有空礙不覺令人起長林豐草之思也昨見台臺有疏請告雖大君子難進之節固然第時事方亟非寓內引領賢豪意也况太封翁春秋原未甚高何妨移孝作忠所冀星軺蚤入承明運籌幃幄以九泥固榆關之封而以餘波霑灑津門是所頓足躍耳

與孫愷陽



關外危險荒涼人多避匿不出台臺駐劄其間倏已兩  
月昔裴晉公云賊亾則朝天有日賊在則歸闕無期人  
皆偉之今讀大疏云事完則長嘯山林事不完則膏身  
原野又度越裴晉公而上之矣天下寧有如此忠赤而  
神明不默佑膚功不立奏者乎獨是關外糧料闕乏秣  
飼斷絕誰司輸輓而溺職若是某安所辭罪焉幸荷汪  
度垂慈寬假以逮今日敢忘覆幬之仁茲河水旣泮海  
航可通業於二月望日自津祀神開船抵大沽口候風  
出洋矣儻得仗芘迨至不悞軍興幸莫大焉先此馳聞  
某罪戾山積展布實難請斥未允繼以請告見今病骨  
支離夢繞鄉邦恐不能終事台臺矣

與解石帆

故禮垣都諫張惺宇者沛人也筮仕益都令以卓異著  
聲召入兵垣出閩山右諸塞諸所條畫俱爲邊陲永利  
繼轉工垣值黃流橫溢祖陵湮沒遂有勘河之役建議  
分黃燒淮竟奏安瀾祖陵無恙後轉禮垣當國本未定  
之日請冊立請出閣爭並封爭待嫡一歲之中疏凡十  
四五上強半留中屢經奪俸卒觸聖怒削籍一時海內  
無不想望高標居家念載杜門掃軌勵清修之節庶幾  
彈冠有日而忽作古人矣近以覃恩僅僅循例逐隊贈  
官常少識者殊爲扼腕似猶未免以衆人遇公顧公才  
品真有跨塵寰而凌霄漢者念某鄉試戊子實爲公所



舉士嗣待臯淮徐諗其居鄉懿美尤悉淡媿未能抗章  
揚扆顧安所稱門下士也茲有公冢嗣青衿名振者自  
沛來思欲伏闕上疏并擬謁見祖臺再求表章某謂部  
議欵例已定或難紛更祇有發單議謚政在此時前見  
祖臺於維揚先達皆顯微闡幽不吝齒頰彭城距海陵  
僅一衣帶水料必耳熟有素今彭城在仕版者空無一  
人非賴祖臺口角春風他何望哉

與董思白

目今玉堂金馬之間雕龍繡虎之彥指不勝屈求其胸  
中磅礴筆下淋漓片言而東壁輝騰隻字而雞林紙貴  
者台臺之外不多見也比復翱翔留京提衡國史據董  
狐之直筆擅班馬之兼長獨步蓬瀛永垂琬琰天下文  
章抑孰大於是乎某以三十年交誼睹茲盛事抑何幸  
分華割采而愉快焉念某猥以駑鈍承乏津門昔猶兵  
餉遞任今且督撫兩肩悵無米之難炊徒循墻而滋懼  
鞭策無當伎倆已窮冀惟台臺不棄而終誨之庶幾香  
屑時垂迷雲常豁於以藉手救過萬一乎

與許繩齋

粵自辛酉都門一通聞問嗣是碌碌戎馬錢穀卒卒無  
須臾之間久疎魚雁今四易歲序矣第一思之媿汗竟  
踵皈依之謂何安所稱石交也台臺糠粃勲名塵垢軒  
冕業已澹然烟霞之外獨計人心不古風會日下得一



名世大賢政可秉鈞握樞轉移叔季而乃聽其拂衣長  
往婆娑圖史之林令人不能不切東山之慨耳弟待臯  
津門荏苒四載迄無一善可稱惟是職業之內頗知黽  
勉榮競之塗頗能自持是弟所爲竊附於私淑而期不  
負於當年之切磋者也顧颺技已窮而榆景漸逼台臺  
將無笑其知往而不知返乎今歲轉運事竣行且賦遂  
初矣目今國是瞻烏物情鬪虎貂璫與士大夫角而士  
大夫又自爲角恐非世道人心之福也言念及此卹緯  
憂深遠左黔南又屬第二義矣安得台臺入朝主持於  
上潛收旁落盡化異同歸於蕩蕩平平之域耶

答袁熙宇

疎拙如某積薪固宐不意誤蒙台慈垂念梓里不惜齒  
頰芳潤昌言於朝片言推轂九鼎增榮銜篆明德矢當  
沒齒目今循序量移旣苦無缺加銜任事實非本懷亦  
惟諉之命運聽之當軸而已矣惟是關門兵馬愈增計  
曹本折愈匱疾呼不應最難無米之炊海運告停豈能  
不脛而走近日關門飛檄責成漸急萬一加以違誤軍  
需之罪某其無死所矣今且不暇爲性命計而又何遑  
爲功名計乎一腔藥苦不覺盡吐希惟台照

與趙大司馬明宇

頃見邸報海外屢捷獻俘闕下行且敘功行賞矣勘疏  
出於登撫臚列甚詳而某亦掛名其中可謂厚幸何敢



多言但自某以外津門轉餉司道各官一人不及近見  
貴部題獻俘疏首歸調度於樞相次推接濟於登撫并  
無津門一字憶天啓二年五月內毛帥困頓異域某時  
待臯津撫因運艘回津順賚毛帥公移據實塘報而接  
濟之議始成未幾待臯督餉首發鮮運今三年矣初年  
運糧料十萬次年十二萬今年二十萬其他布疋器械  
纍纍充斥并勅書關防之類無不從津轉賚今塘報奏  
疏具在部科非鑿空侈口者毛帥有無賴藉津門恐未  
可槩行抹煞也毛帥客冬今秋解俘獻馘悉有公移抵  
津解驗某亦厚犒而激勸之但渠欲某代爲具題某則  
嫌於越俎而不敢耳登撫簡重沈帥而與毛帥相左毛

帥亦屢形之奏章見之塘報矣今乃盡以接濟歸登而  
遺津門是耶非耶連年接濟折色少而本色多折色易  
而本色難登運折色津運本色毛帥良心不昧奏牘具  
存試下一檄質之當敘何人即可爲定案矣登撫勘功  
委之道府各廳以故彼中州縣有司俱爲近水樓臺悉  
得列名而津門轉餉司道將領府廳等官猥以隔遠槩  
寘不錄爲公爲私必有能辨之者每歲鮮運事竣具疏  
奏繳司道各官俱云紀錄優敘當此論功行賞之時若  
令巧者競進拙者見遺恐非聖朝平明之政也某素服  
膺聖門伐善施勞之訓極耻爲競獨於此事似覺失平  
若不預白逮事後而言之差何及矣伏惟台臺虛公主



持毋以疎逃見遺敘及津門司道將領府廳等官以爲  
將來轉輸之地餉務幸甚公道幸甚

與孫愷陽

台臺忠義填胸韜鈴滿腹赤手而扶社稷挺身以衛封  
疆茲之入朝原欲商確軍興祈請兵餉非厭巖關之勞  
而希紫闕之榮也大疏預鳴原自洞然不謂咫尺國門  
未獲瞻對天顏忽乃趣令還鎮若謂巖關不可一日無  
台臺者嘻亦異矣某承乏轉餉襟肘自憐滿望台臺入  
朝直達於黻座之前而不謂其中格也則信乎某命之  
窮也昔周文襄開府江南每每乘傳赴京議事此自國  
朝令甲豈至於今乃獨斬之豈左右用事之人別有肺

腸而借巖關爲口實乎要以台臺劬勩弘烈鎖鑰壯猷  
當與方叔召虎異代同稱何詎不足耀青史垂不朽而  
乃以腐鼠嚇也想達人胸次必不緣此少有芥蒂屈指  
台旌已蒞榆關謹頌力削贖敬侯起處伏惟爲國自玉

答李河岑

薊丞招買之難久矣客歲大司農不知地方小民之苦  
堅欲減草價某極力爭之今議已定永平每束五分薊  
玉豐遵每束自六分以至七分不爲少矣料豆照時估  
收買兼以歲事頗稔未爲厲民惟是戶部發價每致稽  
遲某前有疏調賤時不買而貴時乃買之有時不買而  
無時乃買之今日地方受病正坐於此是發價貴蚤也



又在有司奉行得法加意調停官價盡數給發而毋令  
衙役之尅扣買運須選殷實而毋令闔邑之驛騷惟在  
賢有司加之意耳語稱有治人無治法是良吏最要也  
附關州縣不妨分發瘦弱馬匹就近喂養既免轉輸亦  
多節省客歲遷安已曾行之此已試之良法也是移馬  
爲便也以中國之馬與邊騎角終是強弱不敵莫若以  
步勝馬昔岳武穆破拐子馬以麻絮刀如墻而進用步  
卒也邇者遼陽之役西兵走而川兵戰則馬與步之異  
也今關門練車營而多用馬失其旨矣韓淮陰云置之  
死地而後生置之亾地而後存馬多則思奔易敗之道  
也馬兵第當用以哨探及追亾逐北之用不必甚多三  
萬足矣今用六七萬繇馬總戎爲西將未免狃所習也  
兩馬之芻秣可當三兵之糧糗是營馬空減也事例納  
草一項積弊尤多此輩加納渝關每百減二十兩而又  
專擡高價不照永平而照薊州究竟無草到關不過賣  
緣請託鑽求折乾而已國家名器錢糧並屬可惜是事  
例空罷也以上率爾直陳總屬狂瞽之見因承下問敢  
悉其愚臺下高明必有訐謨石畫無須此矣

答天津道錢昭自

猪雞小畜供人飲食刀俎其生甚蕃陰陽精血之間稍  
有雜揉紛錯則幻而爲雙身數足數翼矣政如人有駢  
指未足爲異較之地震星變大是徑庭前不佞家居時



熟聞村落此顛殊夥第無以告官府者耳竊意此等瑣細似不宐以瀆宸聽非敢如王介甫謂災異不足畏而憚爲逆耳之忠者也門下考究古傳甚悉極服博洽但不佞胸臆所見若此要不容不直陳耳

與畢見素

今歲新截漕糧掛欠數多昨有小疏具題想已徹台照矣客秋所截十萬原未筭尖耗入內且也截出不意別無使用兼以設法鼓舞所得晒颺餘米稍多前已具冊咨部而獨未報倉場衙門則一時胥書之誤也今補冊附上晒颺餘米舊例不報近第已一體發運作正支銷但海上風波自所難免豈能一顆一粒盡到關鮮勢不

得不稍從寬裕耳且也去秋雖有贏餘今春大爲不足卽以有餘補不足猶存乎見少也恐難作六年之額矣况六年督餉當另有主者以前官運過之米而欲於後官扣補必費爭執第故以爲難也帶買遼米各處以災荒改折通未措意誠如台諭伯兄欲於山東河南粟米撥補極佩一體之愛惟是雖截粟米亦恐損於漕額前熊漕道條議欲將密昌邊軍比照京軍改折兩月之例大是可行每石折銀六錢可得米十萬石而又省漕船盤剝之苦此等亦粟米也今春緣截漕事竣又密昌糧已抵河西而上未敢僥舌若蚤圖之或可爲也不特此也臨德二倉粟米原以備緩急之用年來積滯不運以



致紅腐近雖欲運入京亦成空譚不若卽以此項常作  
津糧亦可以省截漕第前條議及之部覆未允今檢原  
疏奉覽是在伯兄主張力行耳浙江舊留遼米六萬價  
值第已打算欲作關門今歲米折之數蓋以今歲截漕  
昨已具題掛欠八萬有餘又東兗廣順大五府召買遼  
米戶部原議每石止給七錢共買三十萬石及後改爲  
每石九錢不再給價價增而米遂減共減七八萬石此  
等缺額第於何處下手茹苦甚矣竊計帶運遼米皆用  
新餉召買若今歲省直不買遼米者皆按例改折如浙  
江故事亦可以完關門米折之用而運額不大損也伯  
兄赤心籌國遠慮經時務期京軍宿飽而以緒餘爲第

區畫第非有胸無心者而能忘感哉

### 與孫愷陽

憶昔癸亥之冬過辱台臺攀愛不靳珠玉嘗爲某敘督  
餉疏草矣一字褒揚千秋華袞金石可銷此感不可泯  
也今某兼攝兵餉又已二載所有撫餉疏草自覺樸櫟  
無當顧當捉襟露肘之時概多嘔心瀝肝之語不忍棄  
擲亦欲以災梨棗而存家塾念非台臺孰能洞照弗遺  
鑒此區區於形跡之外者乎不揣蕪劣謹將疏草五冊  
奉塵清覽仍欲借光片言以爲九鼎恃在夙雅不勝隴  
蜀之望希惟台亮慨賜俯允所至荷也

### 與李大司農瞻宇



某昔在秦中備員宇下幸叨二天之庇自鼎借大司農而某又以督餉之役猥承覆露每有呼籲輒荷周全此真三生之緣而百世之感也昨以及瓜在邇題有搜括積存糴本等事一疏內將任內節省錢糧約五萬五千兩有奇逐一臚列內以三萬充關門米折以一萬五千餘還閣部帑金而以一萬留充津門緩急之用均屬正項支銷不敢錙銖妄費者也業奉明旨行部題覆查前二項俱已起解關門取有實收矣念某數年苦心百計節嗇此段公論似難盡行埋沒更望台臺不靳噓植表章一二庶幾區區孤介之操藉以自見於世昔所云海內有一人知己死且不朽者也惟台臺留意焉

答錢昭自

年來關鮮運事最爲棘手幸賴台丈五載同心俾克有濟此之爲感有鏤肝刻骨耳不佞以仲秋五日交代於新餉部黃際老扣至七月終止已發運過一百二萬五千石通計歲額所未運者纔二十五萬石不過一月事耳尚有畿輔東兗未完州縣可以督催或不煩截漕以佐末運矣新秋關門折色月餉不敷川湖兵鼓譟而本色無匱乏之憂則春夏間所經營者預耳台丈在津勞苦功高人言往往求多流謗四出殊不可解頃茲復命多勸不佞宐隨波逐流點綴一二雌黃語以自爲地者惟是世誼至重本心難昧寧與台丈同擯丘壑其何忍



出此也但恐破例入薦或生葛藤故於復命疏中祇以  
陞任離地方者槩置勿論而於搜括積存雜本疏內卻  
詳道台丈節嗇苦心就事論事公論自是較著想邸報  
中已見之矣不佞衰病侵尋歸田之後尚擬再疏請告  
石城之役行止尙未定也

與靖邊孫同知

靖塞不佞舊遊地也憶昔拮据二年僅亦奉職循理非  
有赫然可見之績不意彼中士民之厚尸而祝之比於  
畏壘不佞累書止之不能止也將無爲昌歎之嗜歟臺  
下海岱名流秦朔循吏抽揚片善篤念鄉曲亦復助之  
銀米獎以棹楔此自大君子樂與人爲善之懷顧不佞  
何德以哉此惟有銘鏤肝鬲而已茲因材官趙安攘之  
便敬謝大雅

答來馬湖

憶昔津門共事意氣忻合道義相砥真平生奇邁也台  
丈畧不世出動必萬全齊趙膚功計當首蒙建牙延世  
之賞而尙棲遲藩臬遠遊夜郎斯豈國家功懋懋賞之  
義乎則或有尼之者矣台丈不難蜉蝣軒冕蟬蛻簪纓  
而多算之所及尤能不下堂階而殲大憝固知賢豪作  
用果出尋常萬萬也公論旣明巖棲且久行當雄飛萬  
里爲國長城次公少年飛將亦宜宣力巖疆不佞素辱  
知愛豈不逢人說項也者顧無奈交寡力綿何也試觀



家季自肅資俸尙淺輒出寧前投之極艱極險之地則其不能庇一第可知矣不佞近日承乏留計衰病侵尋飲河已滿無米難炊稍俟明春卽以滿考引身去矣此肝鬲語也齊趙二撫雖得金吾之蔭旋卽削奪不佞何敢別有希冀夫趙撫無論矣齊撫身在行間淹歷數月功亦不薄但不當築京觀以爲誇詡抑客兵以自顯榮耳而論者一槩抹煞異日國家有事誰爲効死力者以蕩平窺鼎之大盜而反遜于各鎮搗巢之邊功此亦近日矯枉過正之一事也然則景武鄒滕之役凡身與其間者尚恐他人從旁揶揄益難向耳食者喋喋其口明矣佳刻自是實錄俟有相知深者間出授之於以表章尊喬梓鷹揚之烈至於椽筆遜美大序歸功尤不佞所爲跼蹐而未敢冒承者也南都昕夕追隨宗伯令弟不獨倚玉爲快若時奉台丈綦履也

與姜神超

台丈前爲不佞鄉場房師張給諫所撰贈章神采陸離足令九原不朽矣迺不佞會場房師實爲職方郎中今贈光祿寺少卿楊公冲所當壬辰癸巳間寧夏時劉之胤運籌中樞厥功良偉嗣以註誤削籍賫志以歿著述甚富其贈官與張同在天啓二年而其後人之式微也更甚竟不能謁蹶而北丐求恩典不佞南遊滁陽乃始詢而知之斯非門牆弟子之責而誰責乎敢恃夙愛仍



祈華袞於台丈儻不靳椽筆慨賜揮洒無悞九月用寶  
之期俾令助勦勞臣泉壤增輝而不佞亦藉手以篤在  
三之義術敢當無紀極矣不腆伴緘希在筦炤

與袁自如

前從故園遠厯翰貺雅意殷殷沁人心脾時卽移書  
弟囑以諸事同心恭聽台臺指南約束爲兢兢不意寒  
門薄怙天降大罰台臺未及抵關視事而寧遠之變作  
矣變起缺餉得餉而散似可爲券而亡弟獨溘焉以歿  
傷耶病耶殊有不可解者傳者謂亡弟出示立法清查  
虛冒又被執後急欲自裁絕無一異悞語以此橫遭毒  
手然也否也今死者已矣亂魁可竟從解網耶且誤餉  
誤國者急自解紛而人又有代爲解者謂事有別因撫  
鎮自取之將令死者何繇瞑目地下耶某於七月下旬  
自里脂車八月五日抵景州聞變驚隕嗣聞該道措餉  
獲免稍稍紓眉不意十二日抵京而卽得台臺撫臣病  
故之疏也骨肉摧殘雁行中斷悲哉痛哉從來衝塞受  
抑罹禍最慘至亾弟極矣幸賴台臺大疏畧其瑕疵取  
其才守又許代題卹典自是覆幬生成之恩但恐將來  
議論紛紜未卜終能仰副德意否耳亾弟待罪宇下者  
年餘客歲寧錦之捷外城之築亦稍効一臂力今歲修  
錦城築杏山遣水卒皆黽勉奏績獨以名位卑微物望  
輕淺索馬價不應索月餉亦不應反被人譏嘲而憤懣



以死葬台臺誰爲垂憐者望俯從優厚議卹施恩於不報可也亡弟七月望前曾有家信以後絕無是以終不得其的耗止就邸報揣摩言之目今旅櫬漂泊家口零丁匪仗鼎力何繇歸里想台臺仁人長者不待某之喋喋矣茲因遣家僮出關扶柩回籍冒昧申謝并以爲懇語不宣心臨楮哽咽

與郭蒼涵

寒門無祿天降之罰亡弟隕於饑軍之手亦三百年來一大變也幸賴臺下命世豪傑定禍難於倉卒申紀法於安定罪人旣得封疆晏然誰之力乎家僮入遼歸來備述臺下周棺衾於窮途置幼穉於加膝哀慟甚深贈

賻甚厚此等交誼古人所稀眞愚兄弟生死骨肉之感也不佞惟有遙望寧城五體投地百頓稽首耳惟是亡弟種禍之根其來久遠目今布散流言煽禍未已閱邸報可知矣然謂亡弟居官不簡禍繇自招不過殞其身名阻其卹典無大關係至謂前官存留錢糧支用未明則闔宗之禍福孤幼之命脉係之矣督師前許代爲奏繳具徵至愛但公署文卷俱已被燬誰爲查核顛末者悲哉亡弟誠不料其溘然長逝致貽不了之局也因思貴道糧廳或有卷案冊籍可據萬望臺下設法查覈委曲回覆其有領出官銀在外買馬置器及買撫賞貨物未竟者尤恐乘機混賴更望台臺覈其見在庫者若干



實支銷者若干買辦未完應於各委名下追納者若干俾令確有着落據實奏繳則兢兢虎視者或可免其蹂躪魚肉而不佞與孤幼輩亦臥得貼席矣不者亡弟已歿文卷已燬欲加之罪何患無辭事係公帑家屬受累臺下寧忍恻然坐視已乎亡弟年來俸廩俱未入家兵變被劫亦無厚蓄此可矢天日者誠恐三人言而市有虎也所倚重臺下者誠不啻二天矣辰下方會議亡弟功罪不佞抗疏陳其顛末卽緣此事獲戾以去固亦甘之恃在梓里通家之誼冒昧唐突希惟崇鑒

答南戶部司屬公書

國家財賦閭閻膏血一耗遼左再耗黔南至於今日倉庾之竭帑藏之匱南北皆然不佞承乏匝月賈生之淚凡幾行下矣聖明在上宵旰勵精日講生節之術尚未得策目前所恃以支給京軍者惟此漕糧耳一開坐截之端運弁百計營求樂從私便萬一京儲告罄輦下十餘萬之饑軍其何以應之憶昔留都共事之時日擊南庾空竭每抱杞憂試觀近日之北庾僅儲一歲不支之糧其萬分可慮已不在南都之後矣今奉明旨仍議補還漕糧不佞再四躊躇終非留計可辦乃爲委曲權宜之術議以未還楚餉之十三萬抵之蓋逝波旣不可挽而黔事尤難卒省楚弓楚得虛來實歸旣不悖天語之森悚亦不煩留都之設處至若堂官已荷霆旨司屬俱



免吹索此則不佞區區軫念并州之極思耳若夫三關  
鈔銀當此新舊二餉疾呼不前方苦無計搜求恐難奪  
此與彼也

答袁自如

朔日得台臺大揭次日卽具小疏呼籲冀發帑四十萬  
可救然眉會兵部亦有疏四輔立爲主持舉國倉皇實  
有同心是日午後召對聖意仍以內帑空匱屢請發帑  
終非長策似謂鑄本犒賞俱行那借亦儘可濟急矣閣  
部再四哀懇迺允發帑十萬刑部贓銀八萬田爾耕贓  
銀五萬共計可得二十三萬雖未奉旨料不爽也做部  
搜括新舊二庫并新到外解共得十萬卽先於初三日  
兌發惟望台臺曉諭軍士使知聖恩浩蕩軍餉已充或  
可保無他虞也

答張梁山

雲中旣苦旱荒又躡戎馬重以地震爲災隕霜見異年  
臺撫循一方問疾苦而起瘡痍拯救殆無遺策俾枵腹  
者阻饑者飽滿明賜而感奮投石此其爲助奚啻韓范  
之烈捧讀大疏載接台劄忝附同舟之末敢忘纓冠之  
誼業經題覆已荷俞旨惟是太原本色可以抵民運者  
一如台諭至臨德二倉僅各以萬石應匪直漕運行糧  
未便傾囊爲挹注實所積無幾方抱愧於涔蹄欲爲西  
江不能也邊疆多事天不雨粟故拮据止此瞻望之私



與躊躇俱諒高明自有洞照耳

又

雲中春餉頃已照額題發見在措解計中吳翰君不日當詣轅門矣敝部三鎮市賞向皆取給年例之中會計錄開列甚悉不佞曾舉以入告無奈罪過深重不能回天聽祇增戰慄憶去歲題發冬餉時既奉應減不言之旨自不敢不議減雲中已議減二萬矣然終不敢臆減疏內又有仍聽督撫諸臣自行開列量裁請旨之語旋奉有宣大如何不報着卽催來一併詳覈具奏之旨蓋聖天子明見萬里知市賞屬防禦方畧故待督撫一言爲金石耳今四閱月矣翹跂大疏有如望歲且伏讀台論市賞俱出年例撫邊卽以恤軍卽此兩言便足了此公案更何遲回至于雲鎮年例每年額該四十五萬內有市賞八萬台諭謂每季以二萬兩咨作市賞自是分欸正論但所云二萬兩者若分于旣減後之欸則不足抑分于未減內之欸則悖旨誠未敢冒昧從事者也此時應酌減與否應分欸與否統望台臺蚤賜題明俾從前葛藤不難斬截此後部發有所適從也

答范質公

緬惟老公祖之秉銓也林居已踰數載立朝不滿二旬此其心跡雙清才品隻隻當於聖賢中求之非尋常可望萬一也序轉已見齟齬居憂復滋淹滯海內共切東



山之仰祖臺空促舍人之裝矣家弟自寅初入仕途待  
舉名邦不佞竊用繫心不勝負乘瘵官之懼惟冀祖臺  
軫念舊日編氓一切地方興除利弊不憚指迷發部則  
道義骨肉之至愛也

答張鳳舉

黔事蔓延八載迄無人能挫其鋒者老公祖訐謨遠猷  
屢奏膚功非大豪傑而能若是乎今復不究其用會將  
得代是真安賊之幸而國家之不幸也惟是一日未離  
地方卽有一日干繫料老公祖胸中武庫自當愈出愈  
奇而千秋不朽之令名亦於焉在矣

答郭蒼涵

今國家所最危急者無如遼左封疆所最依毗者無如  
遼左撫道台丈練達沉毅鎮靜精詳詰兵覈餉除器飭  
防允稱巖塞長城第一人臣事堯舜之主總爲公家起  
見有心有口誰忍自昧其懿好者哉太倉之事不佞亦  
第隨衆昭雪猶在議罰列也聖眷殷隆盡賜豁免則出  
意料外矣至計典一事先是銓部有加銜稱頌之咨不  
佞業兩次移文剖析明其無礙及送單時人復有從中  
萋菲者大抵皆指通廳時事也不佞又復爲剖析於冢  
宰之前指天矢日至再至三卒獲保全則九廟之神靈  
三韓之億兆實式憑之匪區區一人綿力之所及也不  
佞兄弟沐台愛至渥矣曾未卜所報而台丈輒言報耶



答劉青嶽

台臺之立朝也一腔正氣百鍊剛腸諸所匡拂裨益良非淺鮮自台旌去國而依阿風盛人漸有追思汲長孺者矣惟是詔赦原未分明綸扉猶多顧忌想仍姑俟異日耶台臺寵辱靡驚不憂不懼此其涵養識見真晚近所希觀也盛從誤罹法網大慮處分太過涇渭勿淆幸獲從輕結局似一綫公道猶在人心者某未敢居功也辱明誨之惓惓惟有媿汗

答李葵孺

今歲新運賴台臺調度甚蚤處置得宜頃雖以亢陽回空稍遲而甘霖旋霈舳舻無阻挽遲爲速皆台臺之力也不肖疎拙無似謬肩軍國悚悚覆餗深知民運來儀事多不便是以轉輾圖維不得已而有言嗣見江右兩臺疏請卒歸於用旗屬則知不肖非過計矣台臺職掌所關見解稍殊今欲求心跡之明豈必引異同之嫌總之我輩悉從公家起見有何成心如同舟遇風或篙或楫斲共克濟其交致力者其交相忘者也翰教再頌極荷虛公雅誼惟有媿感

答某

尚友編序業已簡出就中殊多龐雜未愜鄙意也謹奉清覽大抵此書世代之升降文體之盛衰歷朝之治亂政事之廢興人才之邪正謀議之得失俱可得於誦讀



觀覽之中是有資於勸懲亦有裨於經濟不獨有益於學問已也不佞因見他選掛一漏萬俾學者如坐井觀天故不揣綿力搜羅三十年而成其凡例條款尚自有說俟稍暇圖之耳

答田御宿

昨因兵部具題欲多備乾糧炒豆以供軍興奉旨預儲敝部恐一時無措故欲借力於五城司坊前疏尙未俞允而兵部又題目前興師急需烘炒等物敝部只得連夜自製漸有頭緒而明旨始下夫烘炒乃行軍必需之物而市買不可得製辦頗費力若得五城協造以備旦晚行軍之需則至荷也每城且先發銀二百兩應用但烘炒務製如法則有敝部之式樣在耳

答饒黃山

大疏自是憂時體國一段竝議所爲敝部佐軍興以匡不肖之不逮者良非淺鮮第此中有利亦有害政欲仰俟指南而台教適及極勿虛衷之雅招商買銅多被騙去開採似屬便計第銅鑛藏在地下則銅錫金銀皆在開採之內誰爲限制萬一聚衆釀亂奈何廣鑛自佳先年敝部會通行省直開鑄而取其息以充新餉然有不肯行錢地方錢本賤而貴其價官自肥而民自瘠後遂相繼報罷今欲舉行先須痛革此等弊端而後可久政如來教所謂爭事理非爭議論者也



答李總河燦岩

老公祖才兼文武身繫安危自頃提兵入衛朝宁倚作  
柱石逮今回鎮河干南北恃爲鎖鑰目今師老財匱令  
人憂心如灼未卜策勛飲至是何時耳濟上無兵海內  
所知曩者赴援殊屬破例不意訛言傳播河兵潰散幸  
老公祖一腔忠赤豚魚爲格中途再還按堵如故大疏  
入告計聖明必且喜動顏色旦暮溫綸吐鳳口也兵至  
之日卽當照例給餉寧敢煩顧慮哉

與梁大胸

撫賞事會議已久亟宐具疏解銀今接貴部大咨又有  
異議恐結局無日奈何治某舊隸編戶今忝同舟豈敢

自生異同以賈罪戾但錢糧各有職掌各有款項那新  
補舊固爲不可若因遼鎮買馬而欲盡動新餉一朝頓  
增二十七萬從此關寧薊津之間將何所賴以供億乎  
萬一兵餉不繼庚癸頻呼非獨治某之憂亦老公祖之  
憂也極知罔寺歲入不多而新餉亦非處其有餘况貴  
部原疏奉有明旨關寧江東缺解月餉應與援兵相權  
濟用不得那移作賞煌煌天語敝部豈敢悖之卽年例  
二十六萬有奇敝部亦非易辦者誠亦無可奈何也惟  
老公祖裁啓幸甚

答張皇親

昨承枉玉適以祈禱未獲謁謝惟有感刻翁臺椒房懿



親護塋地土奉有買給之旨敢不祇奉但此時軍興孔棘所在空乏大慮翁臺不霑實惠故鯁鯁過慮耳嗣拜面命之辱地價既廉無虞奢費且有逃絕新墾諸田可爲通融務在開封府屬之內則結局亦易矣容卽酌議題覆決不至久稽也

答翟凌玄

餉道之議裁起於閣部真不知何所見而云然也糧料船隻舟子爲數孔多夫豈部院一手一足所能集事乎政望老親翁出疏亟寢其議而大疏適至誠所謂發當其可言必有中者矣獨是張君資俸已深勞績尤懋而尚未獲加級敘功第昨已與冢宰昌言之但遇便疏中亦須老親翁代請加銜久任不則遷轉別地尤恐後來者之未能駕輕就熟也總戎暫留以待秋冬二防自是確論想聖明必有亟爲賜俞者矣秦兵本色終難奏辦蓋截漕已多而招買綦難惟有搜括節曠酌給折色誠公私兩便之計也

答安德鄉紳公書

二東不幸天降之災漕輓重地防禦尤亟城操不足復借班軍此誠綢繆桑土之至計也今題留不諧而徵調復與慮餉少而工多思預支以竣役諸老體悉人情良亦至矣惟是監督之報滿在卽則考核委屬未便六年之程期頗遠則坐扣更覺難行目今功令精明事關錢



穀未經題請誠未敢以冥冥決事也獨念台命下頒何容踞拂萬不得已已批該倉申詳准令預借二月卽於明春扣還庶目前少資濡沫而異時不苦藤葛也

### 答侯六真

二東不幸叛兵爲殃天討雖行王師屢潰梟獍大肆跳梁萊城將成丘墟比雖調發援兵爲數近萬只恐徒作西江之水仍爲真保之續十二山河坐見杌搖可爲痛哭流涕長太息者也老年臺文武全才甲兵滿腹一切豐功懋賞赫聲濯靈一見南黔再見燕平此正儆鄉所共欲得以救生靈於塗炭者况用昌將而統昌兵非老年臺誰爲調遣不意空切緇衣未荷俞旨則儆鄉之劫運尚未終耳

### 答張華東

弟前後抗章乞骸幾二十餘上矣迺聖明輒不聽其去而督責愈力又值時事多艱不得不覩顏復出誠不勝頑鈍之羞也俟撫賞事銷算旣竣當再申前請耳弟前以題覆獲戾於政府殊覺惴惴近日儆部諸事多荷優容想在首揆汪度包荒中矣豈老年臺有默爲之地者乎近日言路諸公多得罪者或謂皆繇聖斷諒不誣也獨是吾鄉登萊之事急矣而撫之一字當事多中其魔近日南中大疏剖判甚明已而圍城中登撫有疏鄉紳有疏胥同此意似有挽回天聽之機及弟輩以公疏繼



之轉覺如水投石甚矣其德薄而言輕也今當事卽不專言撫而卒不與以勦之具又不擇能勦之人空言勦何益乎十二山河坐見陸沉我輩幾於垂老無家可爲慟悼者此也疏揭附覽季弟自寅備員司城跼蹐如轅下駒幸賴老年臺賜之青眼稍爲吐氣耳

與申于蕃

不肖待罪度支四年於茲矢心矢日務求節省實不敢爲濫冒混淆也者昨廊櫃錢糧一項原係各關解到公費工食從來俱係敝部自行支銷卽或樽節助餉亦有題不題之異比者不肖以旦莫去國之身一切支用正欲銷算明白又值總理視事遍查錢糧卽廊櫃似不得

獨遺此不肖所爲具題之繇也今總理又鼎借巡視省臺共爲查覈具諭虛公愈慶遭逢昨接面譚知業已洞照無遺矣近日微聞台臺稱廊櫃寄收太倉錢糧有與庫冊不相對者深服綜覈之精因查聞做之時軍旅倥惚援兵鹽菜時刻難遲其有太倉轉發銀兩雖在廊櫃支分原在太倉銷算新庫亦然實未混入廊櫃之內事竣之後造有軍興錢糧文冊奏繳今底冊具在也謹簡出奉覽試一磨對庫冊當自券合矣至於從前經費亦有一二可減損者原係歷來相沿舊例似當裁其將來而不必追其已往也至每歲以五千兩助餉不肖恐貽累後人不得不稍留餘地但任內捐助實不止此今後



卽稍增額無妨是在台裁耳

答呂豫石

伏承老公祖台翰纏纏千言備悉南帑之匱與南餉之急治某忝附同舟其何敢作秦越視也惟是北部之苦較南部有百倍者援兵日集新兵日募苦無以謝九邊行糧正支月糧借支苦無以謝各省直雖有每畝三釐加派通計出入一年之內尚欠一百六十萬有奇老公祖試一平心易地而觀之謂是南匱乎北匱乎南急乎北急乎譬之有二壞舟一則泊于曲堵安流之涯帆檣啟楫雖做從容爲之葺治猶綽如也一則放乎奔濤駭浪之中颶風作于上嵯石激于下長年者將伯助予而不能救惟有載胥及溺而已矣可爲痛哭流涕者此也惟是明旨森然原有同心之諭台諭諄切敢昧編氓之誼如南部事例一項老公祖欲暫緩一年者治某已舉三年所收而盡與之矣關稅方爾經始上年所獲亦自無幾今政不得不清其源尙未敢奉命也南鑄得利殊饒治某祇切健羨真莫能贊一詞矣至於水兌改折允屬目前第一要務前丙寅待臯時疏稱折色止欠萬金者政指各府未改本色之時而言非漫然無據者也今楚餉盡還本色業已恢乎有餘茲議本折通融裒益自是正著歷簡隆萬以來故牘固已然矣覆疏敬爲極力贊成舍此別無長策也此時在在用兵做部歲用折色

五  
卷八  
七



共一千二百萬時事至此某誠未卜死所非敢故爲異  
同有傷和衷之雅耳

答蔡質凡

滇雲遠在天末素稱樂土不謂逆酋突出決裂至此近  
聞臨安已陷尚無邸報或亦風鶴之虛聲道路之流言  
乎不者滇憂方大也翁臺屢疏所談軍前事宐萬里之  
外情形如畫請兵請餉無不曲中肯綮今黔中撥楚餉  
十四萬餘餉部又搜楚蜀餉二萬餘共得十七萬而滇  
雲五年之新舊餉仍以十餘萬計者不與焉餉似無慮  
不繼矣若川貴總督已奉明旨調兵催餉同舟共濟當  
不膜外視也以聖明之威靈重以翁臺之英畧區區小

醜料指日蕩平無疑矣敬拭目以俟

答吳世兄祖學

不佞弟緬想生平受吳老師恩遇最早最深真非捐糜  
頂踵所能稱塞而弟所以報者至淺鮮矣茲者遵諸長  
兄命稍誌墓中之石顧老師歷任宦績旣無所紀載而  
弟又當軍興旁午案牘倥偬之時苦無佳思僅撫夙昔  
甄拔之奇勇退之節離合之概以示感愴大懼老師猶  
龍之德或自弟而晦意諸長兄當弁髦置之而竟以登  
梨棗與素心居士自狀並傳則慙媿無地矣弟比衰頹  
日甚乞骸之章業已二十餘上而未荷賜玦計秋冬之  
間疆場無倣當再申前請耳



答朱恒嶽

鬼方一局十年不結老年臺胸有勝兵目無勅敵旣奏  
永寧之績旋收耆定之功目今我武維揚賊勢日感犁  
庭掃穴當在旦晚勒燕然而垂竹帛夫豈異人任也辰  
下都門震驚兵餉兩空捷仗無策說者欲罷西南顯圖  
東北弟意九簣宐成善後當周已議分作兩年漸爲收  
拾結局之地不識於台指有當否耳

又

滇雲告急索餉甚侈敝部苦無以應幸老年翁慨分黔  
餉一十四萬六千有奇乃知忠君愛國出自天性真能  
不以畛域起見者也弟已藉手題覆而又量撥楚蜀再  
留滇餉以附益之總期接濟滇兵供億援兵以圖少彌  
庚癸之呼耳乃滇中諸薦紳尚欲辭長柳而請他府弟  
未敢聞命也但恐滇不能得之於楚仍借老年翁鼎力  
督催又大疏奉旨云楚餉解黔實未及半此項額餉作  
何開銷查三年黔餉老年翁尙未查叅敝部無繇知其  
確數幸蚤惟結局似不便姑息從事矣

又

同籍兄弟四十二年在海內者落落晨星茲馬見素年  
兄復以遠避寇亂突爲縣令仇螫加以監視彈章竟至  
被逮謫戍煙瘴且籍沒其貲產一貧徹骨見素以青瑣  
終養三十餘年三起京卿高臥不赴棲心禪那家徒四



璧品可知矣此自榜中殊絕人物方且旦晚奠其彈冠  
忽謫異域人共扼腕稍助橐裝以行獨幸兵部定衛適  
得黔中都勻正在老年翁轄屬之內斯真見素九死一  
生之會也老年翁高義薄雲豈其目擊同籍兄弟顛連  
而不爲之所頗聞舊有覓取盤費及委市軍需二例幸  
擇兩端之一蚤給印照以歸是亦無量功德也惟老年  
翁留神焉羽便附聞俟見素行仍當再有懇也

答沈何山

前度支奏議借老年翁爲立晏頓使燕刻生色感篆深  
矣四友圖詩遂已成帙得二老圖詩繼之愈增風雅非  
老年翁首倡何能成此盛事也所惜李湘翁詩贊未備  
或稍爲補之何如弟以謗非待臯民部便已五載撐持  
鞅掌無復人理會聖明勵精每事督責而卒不聽其去  
頃於仲春乘警報稍息復伸前請遂奉有時事艱虞托  
疾規卸之旨弟凜凜斧鑕之及又覩顏復出矣及讀華  
翁二老序拳拳以戀棧爲戒癡頑爲誚則弟誠名教中  
罪人也老年翁便間幸於烏程相公處委曲先容但得  
放弟歸田全其晚節無爲四友二老之羞則拜賜侈矣  
若老年翁與華翁久滯清署尙未大展所抱與弟進退  
正自不侔邇有索瘢於老年翁者會工部有疏剖析聖  
明深以爲然自無容介介也

又



伏承台翰具諗老年翁與華老朝夕深念常著弟胸臆中所爲設身而處悉心而誨者備極真切骨肉之愛兩年翁優游清署尙思退步弟叨此艱鉅常懷不測之憂何戀戀焉不一割也惟是撫賞錢糧屢旨切責見在清查弟不敢以不明不白之身冒昧脫卸稍俟秋冬之交便可結局然後堅意乞骸此中亦殊有一段苦情耳乃老年翁遂先弟得請浮雲軒冕嘯傲林泉翩翩乎仙哉華老已轉冬卿此時想已脂車而北一詩遲之并書箋頭呈覽屈指四友二老出處離合之踪可爲感慨近日次輔冢宰俱掛浮議仕路風波眞自不可測矣

又

四友中二高蹈一仙遊而弟獨困頓縲絏辱身辱國兼辱譜牒圖繪慙負胡可言獨是數十疏乞骸而不得請究且以干聖怒而考選滕狗又後一重公案耳長安公論具知弟非頑鈍戀棧者差可解嘲及讀老年翁台翰亦頗不加擯棄而感可知也長安九卿臺省單疏申揀者不少至公疏或雖具而未敢出獨南中剴切昌言翕然同辭其大僚疏例屬南太宰爲首乃青墩以請告杜門而存憶輒慷慨入告正氣直節領袖臺省生平知己指難多屈聞係老年翁表弟幸爲一言代謝焉弟自春徂秋載離寒暑靜聽處分總如台諭殊未敢過爲戚戚也四友圖石刻甚佳但傳布未廣弟擬並二老詩再合



刻于燕市尚未竣也大都分之爲六合之實五誠有不  
容判然爲二者耳兼金遠貺以橐饋我自是兄弟骨肉  
眞愛弟以區區口腹累林下年友未免汗顏敢用返璧  
前寄詩笺未至想浮沉矣今再寄二笺並手卷一軸解  
網錄二冊無論陳言近况總塵清覽年侄聞十一齡神  
王才超可任愉快弟次子際有年亦十一昨隨弟於請  
室迄今依依左右家口回籍已久獨不肯歸想老年翁  
聞之亦爲一掀髯也

與閔曾泉

不肖某生平硜硜一念誓殫忠貞以報朝廷此可矢天  
日者連年自覺認事太眞罪釁日積前後三十餘疏請  
告未嘗不欲急流勇退希明哲之高風以保全末路也  
不謂天聽轉高流言甚毒致此奇禍嘻亦命矣憶昔與  
台臺朝夕砥礪互相期許者謂何而今辱身辱國兼辱  
知己一至於此每一思之媿汗竟踵無地自容夫復何  
言但某與鄭澹石原無半面知交亦無一毫交際祇以  
明揚大典不勝區區憐才一念兼以雲間爲舊遊地稔  
知財賦素重逋欠難完既有府申起解在途又有商民  
代輸在庫豈能槩擯不錄且考選諸人不乏代輸及續  
解者何獨於澹石而靳之計某先後五疏題明又經台  
臺覆疏降級中間并無纖毫隱匿此在他人或不盡知  
乃台臺則洞若觀火矣不意澹石一降再降掉臂不顧



而府解亦遲延不至此又某意想所不及也所幸公論未泯先後爲某訟寃乞恩者共十四疏聖明廉其無他頗爲轉環移外候問但不知將來可從寬政否言念台臺拂衣高蹈譬之鳳翔千仞豈容以不祥姓名上干記室惟是台臺高誼薄雲決不作尋常冷煖態某誠不靳區區嚮往一念輒附彥威沈年丈便鴻以聞外回奏申救諸疏奉塵清覽庶悉近况耳

與劉青嶽

某度支六載心血盡嘔惟恐上負國恩中負知己下負生平不謂力綿任重竟至一敗塗地悲夫惟是午夜循省差無愧怍長安士民頗著公論所恃區區報稱者此爾此者困頓囹圄四十餘日棲遲蕭寺又七閱月近始完對簿事顧聖意淵微未可測識不識終能仰仗台芘及于寬政否台臺四載雁塞已逾周公居東之期昨晤舊文登解令具言台臺清恙新愈令人悵望無已何時得把臂故園相與徜徉丘壑中也

與林鶴胎

某忝附世誼欣瞻鳳采年來追隨班行不啻斗山在望祗緣簿書困人未遂傾倒茲且待臯侯譴從此益隔雲泥矣因念亡弟自肅猥以天幸得綴老年臺榜末生平頗知砥礪隨分盡職而竟以軍餉不繼隕命亂兵之手真脊原之至痛也客歲襄葬幸賴上饒鄭相公言念舊



屬爲誌其墓稍稍生色于九原惟是墓門之碣未得當  
代名碩一言表章不揣欲以譜牒之誼仰干椽筆倘蒙  
賜之片言而華袞之感且不朽不腆一芹聊申羔雁之  
忱希惟莞在

與馬勝千

聞錄理逼濂洛詞追班馬洵衡文第一手也可勝欽仰  
不肖待臯度支首尾六載每遇聖明召對或披丹入告  
或竦立拱聽蓋未嘗不在側也所有紀注自應什襲珍  
之傳諸子姓以彰熙朝盛事以侈儒生寵榮無奈邸報  
抄傳率多未備患難漂泊復致散佚緬惟台翁夙嘗簪  
筆於殿陛必存製錦於篋笥不揣妄干希將崇禎元年  
正月起至六年三月止一應紀注槩爲簡發俾獲繕寫  
珍藏以了宿願如有未備便借九鼎向當日在直詞林  
諸老一物色之則百朋之駿惠也

答曹葆素

某衰年潦倒乞骸之疏三十餘上竟未得請而卒陷縲  
綆豈非命乎緣客歲仲春念四日某與高涇齋同日請  
告聖明震怒涇齋被譴其徵也而某以鄭澹石事先爲  
總理所讒譖繼爲首揆所挑激遂罹奇禍蓋總理先因  
吳中書條陳鹽法議論不合而首揆則以周給諫開復  
及登萊勦撫二事飲恨已久耳得罪之日某惴惴不敢  
出一語幸長安公論頗明多上言爲呼寃者得免蓋粉



旋脫囹圄而入蕭寺爰書既具竟行曲貨聖明解網恩  
波真浩蕩無涯矣仰視台臺忤璫雖同而聖眷隆重馳  
驛榮歸者政自天壤懸也三徑初歸喘息未定咫尺龍  
門未能展侯乃辱翰教殷殷遠賁蓬華且侈談計曹餽  
餉狀令人跼蹐殊甚夫人臣事主髮膚非吾有而何敢  
居功况處危城居危署實與老先生同憂共戚而又何  
敢獨擅乎總之相愛無已不覺春風洋溢齒頰間某從  
此爲農夫以沒世而得大君子一言許可有餘榮矣

兵燹之後書牘存稿尚有九十三册再三摘錄授梓  
亦僅百篇大抵關乎出處經濟交誼之大者也若督  
以挂一漏萬則有學何能自道  
康熙丙寅二月朔日男際有識

卷八終





